



昭德先生郡齋讀書志卷第四上

四

四

集部其類有三。一曰楚辭類。二曰別集類。三曰總集類。內別集很多。復分爲上中下。昔屈原作離騷。雖詭譎不槩諸聖。而英辯藻思。閎麗演迤。發於忠正。蔚然爲百代詞章之祖。衆士慕嚮。波屬雲委。自時厥後。綴文者接踵於斯矣。然軌轍不同。機杼亦異。各名一家之言。學者欲矜式焉。故別而聚之。命之爲集。蓋其原起於東京。而極於有唐。至七百餘家。當晉之時。摯虞已患其凌雜難觀。嘗自詩賦以下。彙分之曰文章流別。後世祖述之。而爲總集。蕭統所選是也。至唐亦且

七十五家。嗚呼盛矣。雖然賤生於無所用。或其傳不能廣。值水火兵寇之厄。因而散落者十八九。亦有長編鉅軸。幸而得存。其屬目者幾希。此無他。凡以其虛辭濫說。徒爲美觀而已。無益於用故也。今錄漢迄唐附以五代。本朝作者其數亦甚衆。其間格言偉論。可以扶持世教者。爲益固多。至於虛辭濫說。如上所陳者。知其終當泯泯無聞。猶可以自警。則其無用亦有用也。是以不加銓擇焉。

楚辭類

楚辭十七卷

後漢校書郎王逸叔師注。楚屈原名平。爲懷王左徒。博聞強識。嫻於辭令。後同列心害其能而讒之。王怒。疏平。平自傷忠而被謗。乃作離騷經。以諷。不見省納。及襄王立。又放之江南。復作九歌。天問。九章。遠游。卜居。漁父。大招。自沉汨羅以死。其後楚宋玉作九辨。招魂。漢賈誼作惜誓。淮南王小山作招隱士。東方朔作七諫。嚴忌作哀時命。王褒作九懷。劉向作九歎。皆擬其文。而哀平之死於忠。至漢武時。淮南王安始作離騷傳。劉向典校經書。分爲十六卷。東京班固賈逵各作離騷章句。餘十五卷闕而不說。至逸自以爲南陽

人與原同上。悼傷之復作十六卷章句又續爲九思。取班固二序附之爲十七篇。按漢書志屈原賦二十五篇。今起離騷經至大招凡六。九章九歌又十八。則原賦存者二十四篇耳。并國殤禮魂在九歌之外爲十一。則溢而爲二十六篇。不知國殤禮魂何以系九歌之末。又不可合十一爲九。然則謂大招爲原辭可疑也。夫以招魂爲義恐非自作。或曰景差蓋近之。其卷後有蔣之翰跋云。晁美叔家本也。

楚辭釋文一卷

未詳撰人。其篇次不與世行本同。蓋以離騷經九辯九歌天問九章遠游卜居漁父招隱士招魂九懷七諫九歎哀時命惜誓大招九思爲次。按今九章第四九辯第八。而王逸九章注云。皆解於九辯中。知釋文篇第蓋舊本也。後人始以作者先後次第之。爾或曰天聖中陳說之所爲也。

補注楚辭十七卷考異一卷

未詳撰人。凡王逸章句有未盡者補之。自序云。以歐陽永叔蘇子瞻晁文元宋景文家本參校之。遂爲定本。又得姚廷輝本作考異。且言辯騷非楚辭。本書不當錄。

重編楚辭十六卷

右族父吏部公重編獨離騷經仍故爲首篇其後以遠游九章九歌天問卜居漁父大招九辯招魂惜誓七諫哀時命招隱九懷九歎爲次而去九思一篇其說曰按八卷屈原遭憂所作故首篇曰離騷經後篇皆曰離騷餘皆曰楚辭今本所第篇或不次序於是遷遠游九章次離騷經在九歌上以原自序其意近離騷經也而九歌天問乃原旣放之後據憤所作者故遷於下卜居漁父自序之餘意也故又次之大招古奧疑原作非景差辭沈淵不返故以終焉爲楚辭上八卷九辯招魂皆宋玉或曰九辯原作其聲浮矣惜誓弘深或以爲賈誼作蓋近之東方朔嚴忌皆漢武帝廷臣淮南小山之辭不當先朔忌王褒漢宣帝時人後淮南小山至劉向最後作故其次序如此皆西漢以前文也爲楚辭下八卷王逸東漢人九思視向以前所作相濶矣又十七卷非舊錄故去之又頗刪逸離騷經訓釋淺陋者而錄司馬遷原傳冠其首云

續楚辭二十卷

右族父吏部公編擇後世文賦與楚辭類者編之自

宋玉以下至本朝王令凡二十六人計六十篇各爲小序以冠其首而最喜沈括以爲辭近原蓋深探其用意疾徐其步驟而與之偕然亦暇而不迫也

變離騷二十卷

右族父吏部公編公旣集續楚辭又擇其餘文賦或大意祖述離騷或一言似之者爲一編其意謂原之作曰離騷餘皆曰楚辭今楚辭又變而迺始曰變離騷者欲後世知其出於原也猶服盡而系其姓於祖云所錄自楚荀卿至本朝王令凡三十八人通九十  
六首

別集類上

蔡邕集十卷

右漢蔡邕伯喈陳畱圉人仕至左中郎將後爲王允所害邕博學好辭章術數天文妙操音律在東觀欲補漢紀自陳十意及付獄乞黥刑以成書不能得遂死獄中所著文章百四篇今錄止存九十篇而銘墓居其半或曰碑或曰銘或曰神誥或曰哀讚其實一也嘗自云爲郭有道碑獨無愧辭則其他可知矣凡文集其人正史自有傳者止掇論其文學之辭及畧載鄉里所終爵位或死非其理亦附見餘歷官與其

善惡率不錄若史逸其行事者則雜取他書詳載焉

庶後有考

陳思王曹植集一卷

右魏曹植子建也太祖子文帝封植為陳王卒年三十一諡曰思年十餘歲誦讀詩論及辭賦數十萬言善屬文援筆立成自少至終篇籍不離于手景初中撰錄植所著賦頌詩銘雜論凡百餘篇今集僅二百篇通為一卷

王粲集八卷

右後漢王粲仲宣也高平人為魏國侍中粲博物多

隋志植集三十卷唐志植集二十卷今集十卷比隋唐本有以逸者而詩文近二百篇近漢于本傳所載不啻其故

識強記善屬文舉筆便成無所改定時人常以為宿製然正復精意單思亦不能加著詩賦論議垂六十篇今集有八十一首按唐藝文志粲集十卷今亡兩卷其詩文返多于史所記二十餘篇不曉其故

阮籍集十卷

右魏阮籍嗣宗也尉氏人籍志氣宏放博覽羣籍尤好莊老屬文不畱思嗜酒能嘯善彈琴當其得意忽忘形骸雖不拘禮教而發言玄遠晉帝輔政為從事中郎後求為步兵校尉

嵇康集十卷

右魏嵇康叔夜。譙國人。康美詞氣。有風儀。土木形骸。不自藻飾。學不師授。博覽該通。長好莊老。屬文玄遠。以魏宗室婚。拜中散大夫。景元初。鍾會譖於晉文帝。遇害。

### 張華集三卷

右晉張華。茂先也。范陽人。惠帝時爲司空。趙王倫孫秀黨謀害之。華學業優博。辭藻溫麗。圖緯方伎等書。莫不詳覽。家有書三十乘。天下奇秘悉在。博物洽聞。世無與比。集有詩一百二十。哀詞册文二十一。賦三。

### 陸機集十卷

右晉陸機。士衡也。抗之子。少有異才。文章冠世。伏膺儒術。非禮不動。吳滅。退居舊里。閉門勤學。積有十年。太康末。入洛。成都王穎令機率師伐長沙王乂。至河橋。大敗。爲穎所誅。初造張華。華重其名。如舊相識。嘗謂之曰。人之爲木。常恨才少。而子更患多。葛洪著書。亦稱歎焉。所著文章。凡三百餘篇。今存詩賦論議箋表碑誄。一百七十餘首。以晉書文選較正外。餘多舛誤。機仕終平原內史。

### 陸雲集十卷

右晉陸雲。士龍也。吳郡人。惠帝時爲中書侍郎。會兄



元直名潛潯陽人  
蕭統云淵明字元亮  
晉書云潛字元亮宋  
書云潛字淵明或云  
深明名元亮揚集  
孟嘉傳與祭妹文皆  
自稱淵明當從晉  
書末起為州祭酒  
桓參軍任淵明自解  
而歸州名孟嘉不就  
明自號劉裕起兵討

系誅之為鎮軍將軍  
軍淵明參其軍事  
未幾遷建威參軍  
淵明又裕有異志乃  
求為彭澤令去職

機兵敗同遇害雲六歲能屬文性清正有才理與兄  
齊名雖文章不及而持論過之所著文章三百四十  
九篇新書十篇雲仕終清河內史

### 陶潛集十卷

右晉陶潛淵明也潯陽人晉宋史皆有傳晉安帝時  
為彭澤令去職潛少有高趣好讀書不求甚解著五  
柳先生傳以自況世號靖節先生今集有數本七卷  
者梁蕭統編以序傳顏延之誄載卷首十卷者北齊  
陽休之編以五孝傳聖賢羣輔錄序傳誄分三卷益  
之詩篇次差異按隋經籍志潛集九卷又云梁有五

卷錄一卷唐藝文志潛集五卷今本皆不與二志同  
獨吳氏西齋書目有潛集十卷疑即休之本也休之  
本出宋庠家云江左舊書其次第最有倫貫獨四八  
目後八儒三墨二條疑後人妄加

### 鮑照集十卷

右宋鮑照明遠也上黨人世祖以為中書舍人後臨  
海王子項鎮荊州照為參軍子項敗為亂兵所殺初  
孝武好文自謂人莫能及故照悟其旨為文多鄙言  
累句當時謂照才盡實不然也事見沈約書而李延  
壽史乃以世祖為文帝集有唐虞炎序云為宋景所

害儻見於他書乎唐人避武后諱改照爲昭

謝朓集十卷

右齊謝朓玄暉也陽夏人明帝初自中書郎出爲東海太守東昏時爲江祜黨譖害之朓少好學有美名文章清麗善草隸尤長五言詩沈約嘗云二百年來無此詩也文選所錄朓詩僅二十首集中多不載今附入

謝惠連集五卷

右宋謝惠連也方明子元嘉七年爲彭城王法曹行參軍十歲能屬文爲雪賦以高麗見奇族兄靈運每

見其新文曰張華重生不能易也

吳均集三卷

右梁吳均叔宰也史稱均博學才俊體清拔有古氣好事效之謂吳均體有集二十卷唐世搜求止得十卷文亡其七矣舊題誤曰吳筠筠乃唐人此詩殊不類而其中有贈周典嗣柳貞陽輩詩固已知其非筠又有蕭子雲贈吳朝請入東詩蓋在武帝時爲奉朝講則知爲均也無疑矣蕭子雲詩八蕭子顯朱异平均王僧孺詩各一附顏之推譏均集中有破鏡賦今亦亡之

江淹集十卷

右梁江淹文通也。濟陽人。梁初為散騎常侍封醴陵侯。少好學不事章句。畱情於文章。晚節才思微退。人謂才盡。著述百餘篇。自撰為前後集。今集二百四十

九篇

魏晉州名人詩文之行于世者。往往美於史所載也。昌植王及淹皆是。江宜後人。亦附益之。

何遜集二卷

右梁何遜仲言也。東海人。終水部員外郎。遜少能詩。州舉秀才。范雲見其文。嗟賞曰。觀文人質。則過懦。麗則傷俗。能含清濁。古今見之。何生矣。沈約謂每讀卿詩。一日三復。猶不能已。與劉孝綽以文章見重於世。

謂之何劉。王僧孺集其文為八卷。今亡逸不全。

庾信集二十卷

右周庾信子山也。南陽人。梁元帝時為散騎常侍。聘西魏。遂畱長安。孝閔時終司憲大夫。信在梁與徐陵文並綺麗。世號徐庾體。集有滕王道序。

王績東臯子五卷

右唐王績無功也。龍門人。隋大業中舉孝悌廉潔。授六合丞。棄官耕東臯。自號東臯子。唐書以為隱逸。集有呂才序。稱其幼岐嶷。年十五謁楊素。占對英辯。一坐盡傾。以為神仙童子。薛道衡見其登龍門。憶禹賦。

歎曰今之庾信也且載其卜筮之驗者數事云

楊炯盈川集二十卷

右唐楊炯也華陰人顯慶六年舉神童授校書郎終  
婺州盈川令卒炯博學善屬文與王勃盧照隣駱賓  
王以文詞齊名海內稱王楊盧駱四才子亦曰四傑  
炯自謂吾愧在盧前耻居王後張說曰盈川文如懸  
河酌之不竭耻王後信然愧盧前謙也集本三十卷  
今多亡逸

王勃集二十卷

右唐王勃子安也通之孫麟德初劉祥道薦其材對  
策高等授朝散郎沛王名署府修撰以戲爲諸王作  
鬪雞檄高宗怒斥出府父爲交趾令勃往省溺海卒  
勃屬文初不精思先磨墨數升酌飲引被覆面臥及  
寤援筆成篇不易一字時人謂之腹藁有劉元濟序

盧照隣幽憂子集十卷

右唐盧照隣昇之也洛陽人調新都尉病去官隱具  
茨山下手足攣廢疾久訣親戚自沈潁水照隣自以  
當高宗時尚吏已獨儒武后尚法已獨黃老后封嵩  
山聘賢士已已廢著五悲文今在集中嘗自號幽憂  
子

駱賓王集十卷

右唐駱賓王也。義烏人。武后時數言事得罪。貶臨海丞。不得志。棄官去。文明中徐敬業亂。署府佐。為敬業傳檄天下。斥武后罪。后讀之。矍然。及敗亡。不知所之。後宋之間。逢之於靈隱寺。已祝髮為浮屠矣。賓王七歲能屬文。妙於五言詩。中宗詔求其文。得百餘篇。命郗雲卿次序之。

蘇頌許公集二十卷

右唐蘇頌。廷頌也。武功人。調露二年進士。賢良方正異等。除左司率府胄曹。玄宗時中書舍人。知制誥。開

元四年同紫微黃門平章事。頌幼敏悟。一覽五千言。輒覆。景龍後與張說以文章顯。時號燕許。李德裕謂近世詔誥唯頌敘事外為文章。韓休為序。集本四十六卷。今亡其半矣。

陳子昂集十卷

右唐陳子昂。伯玉也。梓州人。文明初舉進士。上書召見。累擢拾遺。聖曆初解官歸養。父喪廬墓。縣令段簡貪暴。脅取其賂。不厭。逮捕死獄中。子昂少以豪俠使氣。及冠折節為學。精究墳籍。耽愛黃老易象。尤善屬文。唐興文章承徐庾餘風。天下祖尚。至是始變雅正。

故雖無風節而唐之名人無不推之柳儀曹曰張說以著述之餘攻比興而莫能極張九齡以比興之暇窮著述而不克備唐興以來稱是選而不作者子昂而已

宋之間考功集十卷

右唐宋之間延清也汾州人武后召與楊炯分直習藝館諂事太平公主為考功員外郎睿宗初貶欽州賜死自魏建安迄江左詩律屢變至沈約庾信以音韻相婉附屬對精密及之間沈佺期又加靡麗回忌聲病約句準篇如錦繡成文學者宗之號曰沈宋徐堅嘗論之間之文如良金美玉無施不可其為當時所重如此

沈佺期集五卷

右唐沈佺期雲卿也相州人及進士第由協律郎遷弘文館直學士常侍中宗宴舞回波為弄辭以悅帝還賜牙緋

杜審言集一卷

右唐杜審言必簡也襄陽人預之後裔擢進士恃高才以傲世嘗對武后賦歡喜詩后歎重其文學李嶠崔融蘇味道為文章四友集有詩四十餘篇而已

張說集三十卷

右唐張說道濟也洛陽人永昌元年賢良方正策第一累遷鳳閣舍人睿宗時兵部侍郎平章事開元十八年終左丞相燕國公說爲文精壯長於碑志朝廷大述作多出其手常典集賢圖書之任間爲天平軍大使及致仕一歲皆卽軍中於家論譔國史晚謫岳州詩益悽惋人謂得江山助

李嶠集一卷

右唐李嶠巨山也贊皇人擢進士第制策甲科爲監察御史武后時同鳳閣鸞臺平章事嶠富才思前與王勃楊炯中與崔融蘇味道齊名晚諸人沒爲文章宿老學者取法集本六十卷未見今所錄一百二十詠而已或題曰單題詩有張方法

張九齡曲江集二十卷

右唐張九齡子壽也曲江人長安二年進士調校書郎以道侔伊呂科策高等爲左拾遺開元中爲中書令卒謚文獻九齡風度蘊籍幼善屬文玄宗朝知制誥雅爲帝知爲相諤諤有大臣節及貶荊州惟文史自娛朝廷許其勝流徐堅論九齡之文如輕縑素練實濟時用而窘邊幅柳宗元以九齡兼攻詩文但不

能究其極耳。集後有姚子彥所撰行狀。呂溫撰真贊。鄭宗珍撰謚議。徐浩撰墓碑。及贈司徒勅詞。

王維集十卷

右唐王維。摩詰也。太原人。開元九年進士。終尚書右丞。維幼能屬文。工草隸。善畫。名盛。安祿山反。嘗陷賊中。賊大宴凝碧池。賦詩痛悼。詩聞行在。後得免死。代宗訪維文章於弟縉。哀集十卷。上之。李肇記維漠漠水田飛白鷺。陰陰夏木轉黃鸝之句。以為竊李嘉祐者。今嘉祐之集無之。豈肇之厚誣乎。

儲光羲集五卷

右唐儲光羲。魯人。開元十四年進士。嘗為監察御史。後從安祿山偽署。賊平。貶死。

王昌齡詩六卷

右唐王昌齡。少伯也。江寧人。開元十五年進士。為秘書郎。又中宏詞。不護細行。貶龍標尉。以世亂歸鄉里。為刺史。閩江曉所殺。昌齡工詩。縝密而思清。時謂王江寧云。

常建詩一卷

右唐常建。開元十五年進士。

歐陽永叔常愛竹徑通幽處。禪房花木深。句。乃建詩也。

劉長卿集十卷



右唐劉長卿字文房開元二十一年進士至德中監察御史以檢校祠部員外爲轉運判官知淮西岳鄂轉運使畱後觀察使吳仲孺誣奏貶潘州南巴尉會有爲辨之者除睦州司馬終隨州刺史長卿剛而犯上故兩逢斥廢詩雖窘于才而能鍛鍊權德輿嘗謂爲五言長城今集詩九卷雜文一卷

顏真卿文一卷

右唐顏真卿清臣也萬年人博學工辭章開元二十二年進士又登制科代宗時爲太子太師使李希烈遇害世謂真卿忤楊國忠李輔國元載楊炎盧杞拒安祿山李希烈廢斥者七八以至於死而不自悔天下一人而已而學問文章往往雜神仙浮屠之說不皆合於理而所爲乃爾者蓋天性然也

蕭穎士集十卷

右唐蕭穎士茂挺也梁宗室之後開元二十三年進士爲史館待制安祿山反竄山南節度崔圓投揚州工曹至官信宿而去客死汝南逆旅門人謚曰文元先生穎士屬文觀書一覽卽誦通百家譜系書籍嘗教授濮陽時號蕭夫子李林甫惡不附已故數罷去閻士和盛推穎士文章以爲聞蕭氏之風者童子羞

唐書云：顧士作伐櫻  
桃賦，以詠李林甫。君子  
恨其褊，摘集中數其  
亂，有曰：每俯臨乎蕭  
牆，森回浥而密規，伺美  
謂林甫之必致寇也。其  
後果階禍。山王亂唐  
遂不振，然則顧士可為  
知矣矣。宜復而友加以  
貶詞，何哉。

稱曹陸

張鷟龍筋鳳髓判十卷

右唐張鷟字文成，辭章藻麗，嘗八中制科，此乃其書  
判也。凡一百首，自號浮休子。

孟浩然詩一卷

右唐孟浩然也，襄陽人。工五言詩，隱鹿門山。年四十  
乃游京師。一日，諸名士集秘省，聯句。浩然句曰：微雲  
淡河漢，疎雨滴梧桐。衆皆欽伏。張九齡、王維雅稱道  
之。維私邀入禁林，遇玄宗臨幸，浩然匿牀下。維以聞  
上，曰：素聞其人，因召見，命自誦所為詩。至不才明主

棄之，句上曰：不求進而誣朕棄人，命放歸。所著詩二  
百一十首，宜城處士王士源序次為三卷。今併為一  
又有天寶中韋縉序

嚴從中黃子集三卷

右唐嚴從開元中為著作郎，春宮侍讀，集賢院學士。  
卒，自號中黃子。當時命太子侍文呂向訪遺文於家，  
得訓老經頌等八篇，序為三卷。

李翰林集二十卷

右唐李白太白也。白舊集十卷，唐李陽冰序。咸平中  
樂史別得白歌詩十卷，凡歌詩七百七十六篇，又纂

雜著爲別集十卷。宋次道涪平中得王文獻及唐魏萬所纂白詩。又哀唐類詩。洎刻石所傳者。通李陽冰樂史集共一千一篇。雜著六十五篇。曾子固乃考其先後而次第之。云白蜀郡人。天寶初至長安。明皇召爲翰林供奉。頃之不合去。安祿山反。明皇在蜀。永王璘節度東南。白時臥廬山。迫致之。璘敗。坐繫潯陽獄。崔渙宋若思驗治白。以爲罪薄。釋白囚。使謀其軍。乾元元年。終以汙璘事。長流夜郎。以赦得釋。過當塗。以卒。其始終更涉如此。此白之詩書所自序。可考者也。舊史稱白山東人。爲翰林待詔。又稱白在宣城。謁見永王璘。遂辟爲從事。而新書又稱白流夜郎。還潯陽。坐事下獄。宋若思釋之者。皆不合於白之自序。蓋史誤也。予按杜甫詩。亦以白爲山東人。而蘇子瞻嘗恨白集爲庸俗所亂。則白之自序。亦未可盡信。而以爲史誤。近蜀本又附入左縣邑人所哀。曰白隱處少年所作六十篇。尤爲淺俗。白天才英麗。其辭逸蕩雋偉。飄然有超世之心。非常人所及。讀者自可別其真僞也。

### 岑參集十卷

右唐岑參南陽人。文本之後。天寶三年進士。累官補

闕起居郎出嘉州刺史杜鴻漸表置幕府爲職方郎中兼侍御史罷終于蜀參博覽史籍尤工綴文屬詞清尚用心良苦其有所得往往超拔孤秀度越嘗情每篇絕筆人競傳諷至德中裴越薦杜甫等常薦其識度清遠議論雅正佳名早立時輩所仰可以備獻替之官云集有杜確序

李嘉祐詩二卷

右唐李嘉祐別名從一趙州人天寶七年進士爲秘書正字袁台二州刺史善爲詩綺靡婉麗有齊梁之風時人以比吳均何遜云

高適集十卷集外文二卷別詩一卷

右唐高適達夫也又字仲武渤海人天寶八年舉有道科中第永泰中終散騎常侍五十始爲詩卽工以氣質自高每一篇出好事者輒傳布云

賈至集十卷

右唐賈至幼幾也洛陽人天寶十年以明經擢第累官起居舍人知制誥從幸西川當讓傳位冊旣進藁上曰先天誥命乃父爲之今茲冊命爾又爲之兩朝大典出卿父子可謂繼美矣大曆中終散騎常侍集李邯鄲淑家本二十卷蘇弁編次常仲儒爲序以墓

銘序碑列于後今亡其半矣蘇子瞻嘗行呂惠卿責詞有元兇在位之語仇人乃曰史唯宋太子劬謂之元兇因誣其指斥殊不知曹子建責躬詩有曰元兇是幸蓋自謂也今至制誥中除魏仲犀徐歸道詞亦以元兇指祿山豈獨劬爲元兇邪世多疑子瞻失詞因表出之

錢起詩二卷

右唐錢起徵之父也吳郡人天寶中舉進士初從鄉薦客舍月夜聞人哦于庭曰曲終人不見江上數峰青起攝衣從之無所見矣及就試詩題乃湘靈鼓瑟也起卽以鬼謠十字爲落句主文李暉深嘉之擢置高第釋褐授校書郎終考功與郎士元齊名時曰前有沈宋後有錢郎

元子十卷琦玕子一卷文編十卷

右唐元結次山也後魏之裔天寶十三年進士復舉制科授右金吾兵曹累遷容管經畧使始在商餘山稱元子逃難入琦玕洞稱琦玕子或稱浪士漁者稱爲聲叟酒徒呼漫叟及官呼漫郎因以命其所著結性耿介有憂道閔世之意逢天寶之亂或隱自謂與聾牙豈獨其行事而然其文辭亦如之然其辭義幽

約譬古鐘磬不諧於俚耳而可尋玩在當時名出蕭  
李下至韓愈稱數唐之文人獨及結云

韓翊詩五卷

右韓翊君平也南陽人天寶十三年進士淄青侯希  
逸宣武李勉繼辟幕府俄以駕部郎中知制誥終於  
中書舍人翊詩興致繁富朝野重之

杜甫集二十卷集外詩一卷注杜甫詩二十

卷蔡興宗編杜甫詩二十卷趙次公注杜甫  
詩五十九卷

右唐杜甫子美也審言之孫天寶十三年玄宗朝獻

太清宮享廟及郊奏賦三篇使待制集賢院宰相試  
文再遷右衛率府胄曹終於劍南叅謀檢校工部員  
外曠放不自檢好論天下大事高而不切少與李白  
齊名時號李杜數當寇亂挺節無污爲歌詩傷時撓  
弱情不忘君人憐其忠云集有王洙原叔王琪君玉  
序本朝自王原叔以後學者喜杜詩世有爲之注者  
數家率皆鄙淺可笑有托原叔名者其實非也呂微  
仲在成都嘗譜其年月近時有蔡興宗者再用年月  
編次之而趙次公者又以古律詩雜次第之且爲之  
注兩人頗以意改定其誤字入不善之云

獨孤及毗陵集二十卷

右唐獨孤及至之也洛陽人天寶十三年舉洞曉立經科代宗初爲太常博士濠舒二州刺史政最徒常州卒官幼有成人之量徧覽五經觀其大義不爲章句學爲文以立憲誠世褒賢遏惡爲用長於論議唐實錄稱韓愈師其爲文云集有李丹梁肅前後序末載崔祐甫碑誌

皇甫冉詩二卷

右唐皇甫冉茂政也丹陽人天寶十五年進士爲無錫尉歷拾遺補闕卒與弟曾齊名當時比張氏景陽

孟陽云集有獨孤及序

郎士元詩一卷

右唐郎士元字君胄中山人天寶十五年進士爲郢州刺史與錢起俱有詩名而士元尤更清雅時朝廷公卿出牧奉使若兩人無詩祖行人以爲愧

顧況集二十卷

右唐顧況字通公蘇州人至德二年江東進士善爲歌詩性詼諧德宗時柳渾輔政以秘書郎召況素善李泌及泌相自謂當得達官久遷著作郎及泌卒有調笑語貶饒州司戶卒集有皇甫冉詩序

陳蛻詩一卷

右唐陳蛻集有長安十五詠自序云蛻生長江淮間以詩句從賦僅十餘年矣今我后撫運澤及四夷蛻復得爲太平人也云云蓋肅代間人也

盧綸詩一卷

右唐盧綸與吉中孚韓翃錢起司空曙苗發崔峒耿湣夏侯審李端皆能詩齊名號大曆十才子綸字允言累舉進士不第

耿湣詩二卷

右唐耿湣寶應元年進士爲左拾遺

韋應物集十卷

右唐韋應物京兆人天寶時爲三衛周道遙公冀之後左僕射扶陽公待賈生令儀令儀生鑿鑿生應物永泰中任洛陽丞京兆府功曹大曆十四年自鄆縣制除機陽令稱疾辭歸建中二年授比部郎中守滁州居頃之改江州召還擢左司郎中或媚其進媒藥之出爲蘇州刺史性高潔鮮食寡欲所居焚香除地而坐詩律自沈宋以後日益靡爛鏤章刻句揣合浮切音韻諧婉屬對麗密而嫻雅平淡之氣不在矣獨應物之詩馳驟建安以還得其風格云



李端司馬集三卷

右唐李端趙州人大曆五年進士。為校書郎。卒官杭州司馬。郭曖尚昇平公主。賢明招納士類。故端等多從曖游。嘗進官宴客。端席上賦詩甚工。一坐稱歎。錢起曰：素為之請賦。起姓端，立獻一章云：新開金埒看調馬，舊錫銅山許鑄錢。起乃服，主喜，厚賜帛之。

李益詩一卷

右唐李益君虞也。姑臧人。大曆四年進士。調鄭縣尉。幽州劉濟辟從事。憲宗雅聞其名，召為集賢殿學士。負才凌籍士眾，不能堪，暴其獻濟詩，不上。望京樓之句，以涉怨望，詔降秩。俄復舊。益少富，詞藻長於歌詩，與宗人賀齊名。每作一篇樂工以賂求取，被聲歌供奉天子。征人早行篇，天下皆施之圖繪。今集有從軍詩五十篇，而無此詩，惜其放逸多矣。

陸贄奏議十二卷

右唐陸贄敬輿也。贄嘉興人。大曆八年進士。中博學宏詞。書判拔萃科。德宗初為翰林學士。從奉天還為中書舍人。平章事。贄在奉天日，下詔書數百，初如不經思，逮成皆周盡人情。嘗為帝言：今盜徧天下，宜痛自悔以感人心。誠不吝改過，以言謝天下。使臣持筆



無所忌庶叛者革心上從之故下制書雖武夫悍卒  
無不感動流涕議者謂興元戡難功雖爪牙宣力蓋  
贊有助焉舊有柳郊集外校子集五卷議論集三卷翰苑集十  
卷元祐中蘇子瞻乞校正進呈改從今名疑是哀諸  
集成此書

王建詩十卷

右唐王建也仲和建長子樂府與張籍相上下大曆十年進士為昭應縣丞大和中陝

州司馬九長宮詞

柳郊詩一卷

右唐柳郊與李端盧綸輩相酬贈詩大曆間進士也

武元衡臨淮集二卷

右唐武元衡伯蒼也河南人建中四年進士元和三  
年以門下侍郎平章事出劍南節度八年復秉政明  
年早朝遇盜害之元衡工五言詩好事者傳之被於  
管絃嘗夏夜作詩日夜久喧暫息池臺唯月明無因  
駐清景日出事還生翌日遇害舊有臨淮集七卷此  
其二也議者謂唐世工詩宦達者惟高適宦達詩工  
者惟元衡

羊士諤詩一卷

右唐羊士諤也貞元元年擢進士第順宗時為宣歙

在集中第十卷錄  
出別行

巡官王叔文所惡貶汀州寧化尉元和初李吉甫知  
獎擢監察御史掌制誥出爲資州刺史

麴信陵集一卷

右唐麴信陵貞元元年進士爲舒州望江令卒

楊巨源詩一卷

右唐楊巨源字景山河中人貞元五年第進士爲張  
弘靖從事自秘書郎擢太常博士遷禮部員外郎出  
爲鳳翔少尹復召除國子司業巨源在元和中詩韻  
不造新語體律務實用功頗深旦暮搖首微詠不輟  
年老成疾嘗贈弘靖詩敘其家世云伊陟無聞祖韋  
賢不到孫時人稱之年滿七十丐歸時宰惜其去以  
爲其鄉少尹不絕其祿太和以官壽卒

歐陽詹集十卷

右唐歐陽詹行周也泉州人貞元八年進士終國子  
四門助教初閩人不肯北宦及常袞爲觀察使興學  
勸士舉進士自詹始與韓愈李觀李絳聯第皆天下  
選時號龍虎榜云此集福州刺史李貽孫纂

韓愈集四十卷集外文一卷

右唐韓愈退之也南陽人貞元八年進士累擢知制  
誥進中書舍人遷吏部侍郎爲京兆尹與李紳不協

紳出愈罷爲兵部俄復舊劉昫唐書稱愈恃才肆意  
蓋孔孟之旨若南人妄以柳宗元爲羅池神而愈碑  
以實之李賀父名晉肅不應進士而愈作諱辨又爲  
毛穎傳譏戲不近人情此文章之甚紕繆者新書稱  
愈三歲而孤自知讀書比長盡通六經百家學性明  
銳不說隨每言文章自相如子長後作者不世出故  
深探本原卓然樹立成一家言造端置辭要爲不襲  
蹈前人者議者謂舊史謂愈文章甚紕繆固不待辨  
而新史謂造端置辭不蹈襲前人亦未爲知愈蓋愈  
之置辭字字悉有據依其造端如毛穎傳進學解之  
類皆有所師範云其集屢經名人是正其訛舛絕少  
但編次殊失倫類有暇日者再宜編之

李絳論諫集七卷

右唐李絳深之也贊皇人貞元八年進士中宏詞補  
渭南尉六年進中書侍郎平章事太和初爲山南西  
道節度南蠻入寇爲亂兵所害絳偉儀質以直道進  
退望冠一時賢不肖大分屢爲讒邪所中平生論諫  
數十百事其甥夏侯孜所編大中史官蔣偕爲序

李觀文編三卷外集二卷

右唐李觀元賓也華之從子貞元八年進士中宏詞

科終太子校書郎觀爲文不襲前人時謂與韓愈相  
上下議者以觀文未極愈老不休故擅名陸希聲大  
順中編觀文爲之序以爲觀尚辭故辭勝理愈尚質  
故理勝辭雖愈窮老終不能加觀之辭觀後愈死亦  
不能逮愈之質云其後蜀人趙昂又得其安邊書至  
晁錯論一十四首爲後集二卷頃年從父詹事公掌  
誥命以四之日爲四日不學者闕然以爲非今觀集  
中亦嘗如此用乃知本於此

柳宗元集三十卷集外文一卷

右唐柳宗元子厚也河東人後魏濟陰公某之裔貞元九年

進士中博學宏詞科授校書郎終於柳州刺史宗元  
少精敏絕倫文章卓偉精緻既竄斥壇厄感鬱一寓  
諸文倣離騷數十篇讀者悲惻在柳州進士走數千  
里從學經指授者文辭皆有法世號柳柳州韓愈評  
其文曰雄深雅健似司馬子長崔蔡不足多云集中  
有御史周君礪司馬溫公考異以此礪爲周子諒礪  
實開元二十五年也柳作天寶時悞按此礪殊疎畧  
舊唐書紀牛仙客傳玄宗實錄皆載子諒彈牛仙客  
杖流瀼州死藍田

劉禹錫夢得集三十卷外集十卷

右唐劉禹錫夢得也中山人貞元九年進士登博學宏詞科貶朗州司馬元和十年召還欲任以南省郎作玄都觀看花詩譏忿當路出爲播州刺史裴度以母老爲請得易連州入爲主客郎中復作游玄都詩以詆權近俄分司東都遷賓客會昌時加檢校禮部尚書卒禹錫少工文章恃才而廢老年寡所合乃以文章自適素善詩晚節尤精白居易推爲詩豪嘗言其詩在處應有神物護持禹錫早與柳宗元爲文章之友稱劉柳晚與居易爲詩友號劉白雖詩文似少不及然能抗衡二人間信天下之奇才也

### 孟東野詩集十卷

右唐孟郊東野也湖州人貞元十二年進士調溧陽尉辟爲興元叅謀卒郊少隱嵩山性介寡合韓愈一見爲忘形交爲詩有理致然思苦澁李觀論其詩曰高處在古無上平處下顧二謝云張籍謚爲貞曜先生集宋次道重編先時世傳汴吳鏤本五卷一百二十四篇周安惠本十卷三百三十一篇別本五卷三百四十篇蜀人蹇濬用退之贈郊句纂咸池集二卷一百八十篇自餘不爲編帙雜錄之家家自異次道總拾遺逸摘去重複若體製不類者得五百十一篇

而十聯句不與焉一贊二書附于後郊集於是始有完書

### 呂溫集十卷

右唐呂溫。和叔也。一字化光。河中人。貞元十四年進士。以善韋執誼。主叔文起家。再命左拾遺。同張薦使吐蕃。元和初使還。累進知御史雜事。再貶道州刺史。徙衡州。溫從梁肅爲文章。規摹左氏。藻贍精富。流輩推尚。劉禹錫爲編次其文。序之云。古之爲書。先立言。而後體物。賈生之書。首過秦。而荀卿亦後其賦。故斷自人文化成。論至諸葛武侯廟記爲上篇。今集先賦詩。後雜文。非禹錫本也。

### 李翱集十八卷

右唐李翱。習之。涼武昭王之後。貞元十四年進士。調校書郎。知制誥。會昌初。終山南東道節度使。翱性峭鯁。論議無所屈。仕不得顯。宦佛鬱無所發。從韓愈爲文辭。致渾厚。見推當時。集皆雜文。無歌詩。前有蘇舜欽序云。唐之文章。稱韓柳。翱文雖辭不迫韓。而理過於柳。

### 張籍詩集五卷

右唐張籍。文昌也。和州人。貞元十五年登進士第。終

國子司業籍性狷急為時惟長於樂府多警句元和中與  
白樂天孟東野歌辭天下宗之謂之元和體云集張  
洎編一本續三卷

文心雕龍

右晉劉勰撰評自古文章得失別其體製凡五十篇  
各係之以贊云余嘗題其後曰世之詞人刻意文藻  
讀書多滅裂杜牧之以龍星為真龍王摩詰以去病  
為衛青昔人譏之然亦不足怪蓋詩賦或率爾之作  
故也今勰著書垂世自謂嘗夢執丹漆器隨仲尼南  
行其自負不淺矣觀其論說篇籍稱論語以前經無  
論字六韜二論後人追題是殊不知書有論道經邦  
之言也其疎畧殆過於王杜矣

十七夜 鮑校


昭德先生郡齋讀書志卷第四上



昭德先生郡齋讀書志卷第四中

別集類中

白居易長慶集七十一卷



右唐白居易樂天太原人貞元十七年進士中拔萃科元和初制策一等調監厩尉入翰林為學士太和  
中遷刑部侍郎會昌初以刑部尚書致仕居易以文章精切然最工詩初頗以規諷得失及其多更下偶俗好當時士人爭傳雞林國賈相率篇易一金在杭州自類詩藁分諷諭閑適感傷雜律四類前集五十卷有元稹序後集二十卷自為序紀又有續後集五

卷今亡三卷矣。予嘗謂樂天進退以義，風流高矣。與劉禹錫游，人謂之劉白，而不陷入司馬黨中。與元稹游，人謂之元白，而不蹈北司黨中。又與楊虞卿爲姻家，而不陷牛李黨中。嗚呼！叔世有如斯人之髣髴者乎？獨集後載聞李崖州貶二絕句，其言淺俗，似幸其禍敗者。余固疑非樂天之語，及以唐史攷之，崖州貶時樂天沒將踰年，或曰浮屠某作也。

戴叔倫述藁十卷外詩一卷書狀一卷

右唐戴叔倫，幼公也。潤州人，爲人溫雅，善舉止。貞元十六年進士，累遷容管經畧使，政治稱最。德宗賜中和詩，世以爲榮。代還，請爲道士，未幾卒。集有馬總序，或題會錄云：唐史但云師事蕭頴士，初不稱其能詩，以時人少其詩骨氣，綵弱故也。

權德輿集五卷

右唐權德輿，載之也。秦州人，未冠以文章稱諸儒間。貞元十五年，知制誥，累官中書舍人。元和五年，以禮部尚書平章事。德輿三歲知變，四聲四歲能賦，詩積思經術，無不貫綜。自始學至老，未曾一日去書。其文雅正，瞻縵當時公卿功德卓異者，皆所銘紀。雖動止無外飾，其醞藉風流，自然可慕。貞元元和間，爲縉紳

羽儀其兩漢辨亡論世祖封不義侯議世多稱之云  
嘗自纂制誥集五十卷楊憑爲序今亡逸文集孫憲  
孫編次楊嗣復爲序

符載集十四卷

右唐符載字厚之岐襄人幼有宏達之志隱居廬山  
聚書萬卷不爲章句學貞元中李巽江西觀察薦其  
材授奉禮郎爲南昌軍副使繼辟西川韋臯掌書記  
澤潞郃士美叅謀歷協律郎監察御史元和中卒段  
文昌爲墓志附於後集皆雜文末篇有數詩而已集  
前有崔郡王湘送符處士歸觀序皆云載蜀人以比

司馬王揚云

張登集六卷

右唐張登性剛潔介特始以巾褐就辟歷衛佐廷尉  
平監察御史貞元中改河南士曹椽遷殿中侍御史  
漳州刺史居七年坐公累受劾吏議侵誣感疾卒權  
德輿爲之序甚詳以公幹景陽比之國史補亦稱登  
長於小賦氣宏而密間不容髮有織成隱起結綵蹙  
金之狀其舊集詩賦之外書啟序述誌記銘誄合一  
百二十二篇今存者纔六十餘首

戎昱集二卷

右唐戎昱撰初李燾廉察桂林月夜聞隣居吟咏之音清暢遲明訪之乃昱也卽延爲幕賓後因飲席調其侍兒燾微知其意卽贈之昱感怍賦詩有恩合死前酬之句又爲衛伯玉荆南從事後歷辰虔二州刺史

元稹長慶集六十卷

右唐元稹微之也河南人擢明經書判入等授校書郎元和初舉制科對策第一拜左拾遺在江陵與監軍崔潭峻善潭峻以稹歌詩奏御穆宗賞悅卽以祠部郎中知制誥未幾入翰林爲中書舍人承旨學士

長慶二年拜同中書門下平章事稹爲文長於詩與白居易齊名號元和體往往播樂府穆宗在東宮妃嬪近習誦之宮中呼元才子及知制誥變詔書體務純厚明切盛傳一時有長慶集百卷今亡其四十卷  
皇甫湜文六卷

右唐皇甫湜持正也睦州人元和元年進士仕至工部郎中裴度辟東都判官度修福先寺求碑文於白居易湜怒曰近舍湜而遠取居易請從此辭度謝之湜卽酣飲援筆立就度贈車馬繪綵甚厚湜怒曰吾自爲顧况集序未嘗許人今碑字三千一字三縑何

遇我薄耶。度笑曰：不羈之才也。從而酬之。今集雜文三十八篇而已。况集序在焉。而碑已亡矣。

李紳追昔遊三卷

右唐李紳公垂也。亳州人。元和元年進士。補國子助教。穆宗名爲翰林學士。累進中書舍人。武宗卽位。拜中書侍郎平章事。紳爲人短小精悍。於詩最有名號短李。與李德裕元稹同時。號三俊。追昔遊者。蓋賦詩紀其平生所遊。歷謂起梁漢。歸諫署。升翰苑。及播越荆楚。逾嶺嶠。止高安。移九江。過鍾陵。守滁陽。轉壽春。畱洛陽。廉會稽。分務東周。守蜀。鎮梁也。開成戊午八

月目爲之序

鮑溶詩一卷

右唐鮑溶德源。元和四年進士。張薦謂溶詩氣力宏贍。博識清度。雅正高古。衆才無不備具云。

朱倣詩一卷

倣字長通。襄陽人。隱居剡溪。嗣曹王臯。鎮江西。辟節度叅謀。貞元初。名爲拾遺。不就。

沈亞之集八卷

右唐沈亞之。字下賢。長安人。元和十年進士。涇原李彙辟掌書記。爲秘書省正字。長慶初。補櫟陽尉。四年

此本之後有景文宗  
公題字稱得之於端  
明李學士編次三倫唐  
李也予欣愛其能造語  
法其本極外漢厥正是  
且其哀其遠缺者數  
篇及所收商隱三詩附  
於後

為福建都團練副使事徐晦後累進殿中丞御史內  
供奉太和三年栢耆宣慰德州取為判官耆罷亞之  
貶南康尉後終郢州掾亞之以文詞得名狂躁貪冒  
輔耆為惡故及於貶常遊韓愈門李賀杜牧李商隱  
俱有擬沈下賢詩亦當時名輩所稱許云

姚合詩十卷

右唐姚合也崇曾孫以詩聞元和十一年李逢吉知  
舉進士歷武功主簿富平萬年尉寶應中監察殿中  
御史戶部員外郎出金杭二州刺史為刑戶二部郎  
中諫議大夫給事中陝虢觀察使開成末終秘書監

世號姚武功云

施肩吾西山集五卷

右唐施肩吾吳興人元和十五年進士以洪州西山  
十二真君羽化之地慕其真風高蹈于此輯其所著

自為之序

李賀集四卷外集一卷

右唐李賀長吉也鄭王之孫七歲能辭章韓愈皇甫  
湜聞之過其家使賦詩援筆輒就自目曰高軒過二  
人大驚年二十七終協律郎賀辭尚奇詭為詩未始  
先立題所得皆警邁遠去筆墨畦逕當時無能效者

樂府十數篇雲韶工合之絃管云或說賀既卒後為不相悅者盡取其所著投園中以故世傳者不多外集予得之梁子美家姚鉉頗選載文粹中

盧全詩一卷

右唐盧全范陽人隱少室山號玉川子徵諫議不起韓愈為河南令愛其詩厚禮之嘗作月蝕詩以譏元和逆黨愈稱其工後死于甘露之禍

劉義詩一卷

右唐劉義也少嘗任俠教人後更折節讀書善歌詩客韓愈門作冰柱雪車二詩出盧全李賀右歸齊魯

按其詩云元和庚寅蓋五年也憲宗遇弒在十五年後十歲也豈退托庚寅歲事為詩乎不然則史証也

不知所終今集二十餘篇爾不載一詩

斷金集一卷

右唐李逢吉令狐楚自未第至貴顯所唱和詩也後逢吉卒楚編次之得六十餘篇裴夷直名曰斷金集為之序

杜牧樊川集二十卷外集一卷

右唐杜牧牧之也京兆人太和二年進士復舉制科會昌中以考功郎中知制誥終中書舍人牧善屬文剛直有奇節敢論列大事指陳利病為詩情致豪邁人號小杜以別甫云臨死自為墓誌悉焚所為文章

其甥裴廷翰輯其藁編次爲之其文後序樊川蓋杜氏所居外集皆詩也

許渾丁卯集二卷

右唐許渾字用晦。圉師之後。太和六年進士。爲當塗太平二令。以病免。起潤州司馬。大中三年爲監察御史。歷虞部員外。睦郢二州刺史。嘗分司於朱方。丁卯間自編所著。因以爲名。賀鑄本跋云。按渾自序集三卷五百篇。世傳本兩卷三百餘篇。求訪二十年。得沈氏曾氏本。并取擬玄天竺集校正之。共得四百五十四篇。予近得渾集完本五百篇。皆在。然止兩卷。唐藝文志亦言渾集兩卷。鑄稱三卷者。誤也。

雍陶詩五卷

右唐雍陶。國鈞。太和八年進士。大中六年。自國子毛詩博士。出刺簡州。唐志集十卷。今亡其半。

李商隱樊南甲集二十卷乙集二十卷又文集八卷

右唐李商隱。義山也。隴西人。開成二年進士。令狐楚奏爲集賢校理。楚出汴滑興元。皆表幕府。補太學博士。初爲文瑰邁奇。古及從楚學。儷偶長短。而繁縟過之。旨能感人。人謂其橫絕前後。無儔者。今樊南甲乙



集皆四六自爲序。卽所謂繁縟者。又有古賦及文共三卷。辭旨怪詭。宋景文序傳中云。譎怪則李商隱。蓋以此詩五卷清新纖艷。故舊史稱其與溫庭筠段成式齊名。時號三十六體云。

李德裕會昌一品集二十卷。姑臧集五卷。平泉詩一卷。窮愁志三卷。別集八卷。別友賦一

卷

右唐李德裕。文饒也。趙郡人。宰相吉甫之子。少力于學。旣冠。卓犖有大節。不喜與諸生試。有司憲宗時。以詹補校書郎。穆宗初。擢翰林學士。號令大典。皆出于

手。進中書舍人。名兵部尚書中書門下平章事。會昌初。復秉政。平澤潞。策功拜太尉。封衛公。大中貶崖州司戶叅軍。三年卒。德裕性孤峭。明辨有風采。善爲文章。雖在大位。手不去書。謀議援古。哀哀可喜。爲武宗知常。以經綸天下爲已任。時王室幾中興。焉一品集。鄭亞爲之序。皆會昌制誥表狀外內冊贊碑序文也。賦詩四首。窮愁志乃崖州所撰。姑臧集題段全緯纂。上四卷亦制誥。第五乃憂黯斯朝。貢傳與八詩。別集乃哀合古賦。平泉詩集外雜著。又有古賦一卷。載金松等四賦。

劉得仁詩集一秩一卷

右唐劉得仁。公主之子。長慶中以詩名。五言清瑩。獨步文場。自開成後。昆弟皆居顯化。獨自苦於詩。舉進士二十年。竟無所成。嘗有寄所知詩云。外族帝王足中朝。親故稀。翻令浮議者不許。九霄飛及卒。詩僧棲白。以絕句弔之曰。忍苦爲詩身到此。冰魂雪魄已難搖。直教桂子落墳上。生得一枝冤始銷。

劉綺莊歌詩四卷

右唐四庫書目有綺莊集十卷。今所餘止四卷。詩三十二。啟狀四十四而已。惜其散落大半。其本乃南唐

故物。紙墨甚精。後題曰昇平四年。重題印其文云云。

薛逢歌詩二卷

右故唐薛逢。陶臣也。河東人。會昌元年進士。終秘書監。逢持論鯁切。以謀畧高。自標題。與楊收。王鐸同年登第。而逢文藝最優。收作相逢有詩云。誰知金印朝天客。同是沙堤避路人。鐸作相逢又有詩云。昨日鴻毛萬鈞重。今朝山岳一毫輕。二人皆怒。故不見齒。

鄭畋集五卷

右唐鄭畋。台文也。滎陽人。會昌二年進士。書判入等。授校書郎。調渭南尉。知制誥。中書舍人。乾符四年以

本官同中書門下平章事二年召復秉政至成都以病不拜終太子少保藁草皆乾符堂判勅語云

趙嘏渭南詩三卷

右唐趙嘏承祐也會昌四年進士終渭南尉杜紫微讀其早秋詩云殘星幾點鴈橫塞長笛一聲人倚樓因謂之趙倚樓云

孟達詩一卷

右唐孟達字叔之平昌人會昌五年陳商下及第

薛能集十卷

右唐薛能字大拙汾州人會昌六年登進士第大中

末書判中選補盩厔尉辟太原陝虢河陽從事李福鎮滑表署觀察判官歷御史都官刑部員外郎福徙西蜀奏以自副咸通中攝嘉州刺史造朝遷主客度支刑部郎中俄刺同州京兆尹溫璋貶命權知尹事出帥咸化入授工部尚書復節度徐州徙忠武廣明元年徐軍戍澉水經許能以軍懷舊惠館之城中許軍懼見襲大將周岌乘眾疑怒遂能據城自稱畱後因屠其家能政嚴察絕私謁癖於詩日賦一章晚節惑浮屠法奉之唯謹然恣驕倨傲佻輕以忤物及為藩鎮尤易武吏嘗命其子屬囊鞬雅拜新進士或問

其故曰與渠銷弭災咎云

李郢端公詩一卷

右唐李郢楚望也。大中十年進士。詩調清麗。居餘杭。疎於馳競。為藩鎮從事兼侍御史。

鄭嵎津陽門詩一卷

右唐鄭嵎字賓光。大中五年進士。津陽即華清宮之外闕。為詩百韻。紀明皇時事。自有序云。

劉滄詩一卷

右唐劉滄字溫靈。大中八年進士。詩頗清麗。句法絕類趙嘏。

孫樵經緯集三卷

右唐孫樵字隱之。大中九年進士。廣明初黃巢狂寇犯闕。赴岐隴。授職方員外郎。時詔書曰。行在三絕。以常侍

李隲有曾閔之行。前進士司空圖有巢由之風。樵有

楊馬之文。遂輯所著名經緯集。

李群玉詩一卷

右唐李群玉文山也。澧州人。曠逸不樂仕進。專以吟詠自適。詩筆妍麗。才力遒健。好吹笙弄筆翰。親友彊

赴舉。一上而止。裴休廉察湖南。延郡中。大中八年來

京師。進詩三百篇。休復論薦。授弘文館校書郎。集後

嵎前成詞中過之詞  
逆旅主人道承平故  
實明日馬上裁刻成  
句一千四百言

附其進詩表并除官制廣記所載黃陵廟事甚異絕句在焉

張祐詩一卷

右唐張祐承吉清河人樂高尚客淮南杜牧爲度支使善其詩嘗贈之詩曰何人得似張公子千首詩輕萬戶侯嘗作淮詩有人生只合揚州死禪智山光好墓田之句大中中果終丹陽隱舍人以爲讖云

陳陶集二卷

右唐陳陶嵩伯也鄱陽人大中時隱洪州西山自號三教布衣云江南野史有傳

溫庭筠金荃集七卷外集一卷

右唐溫庭筠也庭筠本名岐字飛卿宰相彥博之裔詩賦清麗與李商隱齊名時號溫李能逐弦吹之音爲側艷之辭爲行塵雜由是累年不第終國子助教宣宗嘗作詩賜宮人句有金步搖遣場中對之庭筠對以玉跳脫上喜其敏欲用之而嘗作詩忤時相令狐絢終弃不用

皮日休文藪十卷

右唐皮日休字襲美一字逸少襄陽人隱鹿門山自號醉吟先生以文章自負尤善箴銘咸通八年登進

士第爲著作佐郎太常博士乾符喪亂東出關爲毗陵副使陷巢賊中賊遣爲讖文疑其譏已遂害之集乃咸通丙戌年居州里所編自序云發篋次類文藁繁如藪澤因以名之凡二百篇

司空圖一鳴集三十卷

右唐司空圖表聖也河中人咸通十一年王凝下及第黃巢陷長安僖宗次鳳翔召拜知制誥中書舍人朱溫將篡召爲禮部尚書不赴聞哀帝遇弒不食而卒圖居中條山自號知非子耐辱居士集自爲序以濯纓亭一鳴牕名其集子荷別爲集後記最長於詩其論詩有曰梅止於酸而鹽止於鹹其美常在酸鹹之外謂其詩基聲花院靜幡影石壇高之句爲得之人以其言爲然

唐彥謙鹿門詩一卷

右唐唐彥謙茂業也并州人咸通末舉進士第中和王重榮表河中從事歷節度副使晉絳二州刺史重榮遇害貶漢中椽興元楊守亮畱署判官遷副使閬壁刺史卒彥謙才高負氣無所摧屈博學多藝尤能七言詩師溫庭筠故格體類之世稱耳聞明主提三尺眼見愚民盜一杯蓋彥謙句也自號鹿門先生有

薛廷珪序

曹唐詩一卷

右唐曹唐字堯賓。桂州人。初爲道士。咸通中爲府從事。卒。作遊仙詩百餘篇。或靳之曰。堯賓嘗作鬼詩。唐曰。何也。井底有天。春寂寂。人間無路月茫茫。非鬼而何。唐乃大笑。今集中不見。然他詩及神仙者尚多。

秦韜玉投知小錄三卷

右唐秦韜玉。中明京兆人。有詞藻。工歌吟。險而好進。爲田令孜所善。僖宗幸蜀。令孜引爲工部侍郎。中和二年。賜進士第。編入春榜。

雲臺編三卷。宜陽外編一卷

右唐鄭谷字守愚。宜陽人。光啟三年擢高第。遷右拾遺。歷都官郎中。乾寧四年歸宜春。卒於別墅。其集號雲臺編者。以其扈從華山觀居所編。次云。谷詩屬思頗切於理。而格韻凡猥。語句浮俚。不競不爲。議者所多。然一時傳諷。號鄭都官。而弗名也。

陸龜蒙笠澤叢書四卷

右唐陸龜蒙。魯望也。蘇州人。少高放。通六經大義。尤明春秋。舉進士。一不中。從張搏爲蘇湖從事。居松江甫里。以文章自怡。自號江湖散人。或號天隨子。甫里。

少工歌詩。其辭裁不一。平造平淡而已。

皆為之傳新史多所  
取之而不及工秋詩

今按其集秋詩為多  
天比他文為工秋詩  
編以此

先生笠澤者松江地名也其自序云自乾符六年春  
臥病笠澤遇體中不甚羸耗時亦隱凡著書詩賦銘  
詔往往雜發不類不次混而錄之故曰叢書

韓偓詩二卷香奩集

右唐韓偓致光也京兆人龍紀元年進士累遷諫議  
大夫翰林學士昭宗幸鳳翔進兵部侍郎承旨朱全  
忠怒貶濮州司馬榮懿尉天祐初挈族依王審知而  
卒香奩集一卷或曰和凝既貴惡其側艷故詭稱偓  
著云

李洞詩一卷

右唐李洞換字才江諸王之孫慕賈島為詩銅鑄其  
像事之如神詩人多謂其僻澁不貴其奇峭唯吳融  
稱之昭宗時不第遊蜀卒

杜荀鶴唐風集十卷

右唐杜荀鶴池州人大順二年進士善為詞句切理  
宣州田頔重之嘗以賤問至梁祖薦為翰林學士主  
客員外恃勢侮易縉紳眾怒欲殺之而未及天祐初  
病卒有顧雲序荀鶴自號九華山人

程晏集六卷

右唐程晏字晏然乾寧二年進士集皆雜文



孫郃文纂一卷

右唐孫郃字希韓四明人乾寧四年進士好荀楊孟之書慕韓愈為校書郎河南府文學舊四十卷

朱抃致理書一卷

右唐朱抃襄陽人以三史舉為荆門令乾寧中方士許巖士得幸禁中言抃有經濟才帝幸石門召對即拜諫議大夫平章事

曹松詩一卷

右唐曹松夢徵也舒州人學賈島為詩天復元年與王希羽劉象柯崇鄭希顏同登第年皆七十餘號五

卒  
老勝時以新平內難聞放進士喜特勅授校書郎而

裴說詩一卷

右唐裴說撰天祐三年進士詩有避亂一身多之句  
讀者悲之

羅虬比紅兒詩一卷

右唐羅虬也皇朝方性夫注虬詞藻富贍與其族人隱鄴齊名時號三羅從鄆州李孝恭籍中有杜紅兒者善歌常為副戎屬意副戎聘隣道虬請紅兒歌贈綵孝恭不令受之虬怒拂衣而起詰旦手刃之既而

追其寃作絕句詩百篇借古人以比其艷盛行於時

方干詩集一卷

右唐方干字雄飛歙人唐末舉進士不第隱鏡湖上徐凝有詩名一見干器之授以詩律其貌陋又免缺而喜凌侮嘗謁廉帥誤三拜人號方三拜將薦于朝而卒門人謚玄英先生其甥楊弁孫郃編次王贊爲序郃又爲玄英先生傳附

王德輿詩一卷

右唐王德輿集有次韻和鄭畋詩知其懿僖間人也

沈彬詩一卷

右唐沈彬保大中以尚書郎致仕居高安集中有與韋莊杜光庭貫休詩唐末三人皆在蜀疑其同時避亂嘗入蜀云上李昇山水圖詩在焉

熊皦屠龍集五卷

右晉熊皦後唐清泰二年進士爲延安劉景巖從事天福中說景巖歸朝擢右司諫坐累黜上津令集有陶穀序陳沆賞皦早梅云一夜欲開盡百花猶未知曰太妃容德於是乎在

沈顏聲書十卷

右僞吳沈顏字可鑄傳師之孫天復初進士爲校書

郎屬亂離奔湖南辟巡官吳國建爲淮南巡官禮儀使兵部郎中知制誥翰林學士順義中卒顏少有詞藻琴碁皆臻妙場中語曰下水船言爲文敏速無不載也性閑淡不樂世利嘗病疾當時文章浮靡倣古著書百篇取元次山聲叟之說附已志而名書其自序云自孟軻以後千餘年經百千儒者咸未有聞焉天厭其極付在鄙子其夸誕如此

李煜集十卷

右僞唐主李煜重光也璟之子少聰悟喜讀書屬文工書畫知音律建隆三年嗣僞位開寶八年王師克金陵封違命侯太平興國三年終隴西郡公贈吳王江鄰幾雜志云爲秦王廷美所毒而卒

韓熙載文集格言五卷

右僞唐韓熙載字叔言北海人後唐同光中進士南奔江淮李昇建國用爲秘書郎使與其子璟游璟嗣位爲虞部員外郎史館修撰兼太常博士知制誥頃之請誅陳覺黜和州司馬復召中書舍人累遷兵部尚書第宅華侈妓樂四十餘人不加檢束時人比徐之才璟屢欲倚以爲相用是不果後左授右庶子分司乃盡斥群妓單車引道畱爲秘書監俄復位已而

其去妓皆還上書論古今之變名格言熙載天才俊敏工隸書及畫聲名冠一時自朱元叛後煜頗疑北人多因事誅之熙載愈益淫縱然喜延譽後進如舒雅等後多知名諡曰文

潘佑榮陽集十卷

右偽唐潘佑金陵人韓熙載薦於璟授秘書正字直崇文館煜時爲虞部員外郎史館修撰知制誥中書舍人佑性貞介文章瞻逸尤長論議坐言事悖慢下獄自剄死人頗言張洎譖之

李有中詩二卷

右偽唐李有中嘗爲新塗令與水部郎中孟賓于善賓于稱其詩如方干賈島之徒賓于晉天福中進士也有中集中有贈韓張徐三舍人詩韓乃熙載張乃洎徐乃鉉也春日詩云乾坤一夕雨草木萬方春頗佳他皆稱是

成彥雄梅頂集

右偽唐成彥雄江南進士有劉鉉序

張蟪詩一卷

右偽蜀張蟪字象文清河人唐乾寧中進士爲校書郎櫟陽尉犀浦令建開國拜膳部員外郎後爲金堂

令王衍與徐后游大慈寺見壁間墻頭細雨垂纖草  
水面回風聚落花愛之問之云蟻句給札令以詩進  
蟻以二百首獻衍重之將名爲知制誥宋光嗣以其  
輕傲止賜白金而已蟻生而穎秀幼能爲詩作登單  
于臺有白日地中出黃河天外來之句爲世所稱

牛嶠歌詩三卷

右僞蜀牛嶠字延峰隴西人唐相僧孺之後博學有  
文以歌詩著名乾符五年進士歷拾遺補闕尚書郎  
王建鎮西川辟判官及開國拜給事士卒集本三十  
卷自序云竊慕李長吉所爲歌詩輒効之

韋莊浣花集五卷

右僞蜀韋莊字端已仕王建至吏部侍郎平章事集  
乃其弟藹所編以所居卽杜甫草堂舊址故名云僞  
史稱莊有集二十卷今止存此

盧延讓詩十卷

右僞蜀盧延讓子善也范陽人唐光化元年進士朗  
陵雷滿辟滿敗歸王建及僭號授水部員外郎累遷  
給事中卒官終刑部侍郎延讓師薛能詩不尚奇巧  
人多誚其淺俗獨吳融以其不蹈襲大奇之

羅隱甲乙集十卷讒書五卷

又有吳越掌書記集一卷  
卷隱掌錢修記室  
所著表啟也

右杭越羅隱字昭諫餘杭人唐乾符中舉進士不第  
從事諸鎮皆無合久而歸錢鏐辟掌書記歷節度判  
官副使奏授司勳郎中梁祖以諫議大夫召不行魏  
博羅紹威推為叔父表薦給事中卒隱少聰明作詩  
著文以譏刺為主自號江東生其集皆自為序

孫光憲鞏湖編玩三卷

右荆南孫光憲字孟文陵州人王衍降唐避地荆南  
從誨辟掌書記歷檢校秘書監御史大夫王師收閩  
州光憲勸其主獻三州地乾德中終黃州刺史自號  
葆光子

徐鉉集三十卷

右偽唐徐鉉字鼎臣廣陵人仕楊溥為秘書郎直宣  
徽北院掌文翰李昇時知制誥璟煜時累官為翰林  
學士歸朝為直學士院給事中散騎常侍淳化初坐  
累黜靜難軍司馬鉉初至京師見御毛褐者輒晒之  
邠苦寒竟以冷氣入腹而卒鉉幼能屬文尤精小學  
為文未嘗沈思自云速則意思壯敏緩則體勢疎慢  
云集有陳彭年序

李涉歌詩一卷

右唐李涉渤之弟也早從陳許辟一再謫官夷陵大

文志敏速凡所撰述常  
不音預作有款後其求  
文者必戒臨事即未請  
往執筆立就

和中爲太學博士自號清溪子渤三詩附

賈島長江集十卷

右唐賈島浪仙也燕薊人累舉進士不第文宗時坐飛謗謫長江主簿會昌初終普州司倉參軍島少爲僧名無本後從韓愈遂去浮屠

于武陵詩一卷

右唐于武陵大中進士

皎然杼山集十卷

右唐僧皎然撰字清晝吳興人謝靈運十世孫工篇什德宗詔錄本納集賢院集前有于頔序并贈書上

人詩

貫休禪月集三十卷

當作寶月詩一卷

右唐僧貫休撰字德隱姓姜氏婺州人後入蜀號禪月大師初吳融爲之序其弟子曇域削去別爲序引僞蜀乾德中獻之

清塞詩一卷

右唐僧清塞字南卿詩格清雅與賈島無可齊名寶曆中姚合爲杭州刺史因攜書投謁合聞其哭僧詩云凍鬚亡夜剝遺偈病中書大愛之因加以冠巾爲周賀云

虛中碧雲詩一卷

右唐僧虛中也居玉笥山嘗以詩投司空圖訢云十年太華無知己只得虛中一首詩其見重如此

薛濤錦江集五卷

右唐薛濤洪度也西川樂妓工爲詩當時人多與酬贈武元衡奏校書郎太和中卒李肇云樂妓而工詩者濤亦文妖也

修文要訣三卷

右僞川馮鑑撰雜論爲文體式評其誤謬以訓初學云

別集類下

柳仲塗集一卷

右皇朝柳開字仲塗大名人開寶六年進士太平興國中上書願備邊用授崇儀使知寧邊軍徙全桂二州貶復州團練副使居久之復官歷環邠曹代忻滄五州咸平四年終于京師開幼奇警有胆氣學必宗經慕韓愈柳宗元爲文因名肩愈字紹先旣而易今名字自以爲能開聖道之塗也集乃門人張景所編歐公常推本朝古文自仲塗始

胡周父文集十卷



右皇朝胡旦字周父渤海人太平興國三年進士第  
一人知海州上河平頌先是盧多遜趙普罷頌有逆  
遜投荒姦普屏外之句太宗怒貶商州團練副使上  
平燕八議召復官再遷知制誥翟馬周上封事斥時  
政語連日謫防州團練副使復召知制誥草王繼恩  
制詞溢美流潯州景德初以目病致仕終秘書監爲  
人雋辨強敏少有大志力學以瞻博聞雍熙淳化間  
奏御之文爲時推賞晚節黷貨多干擾州縣持吏短  
長時論薄之

寇忠愍詩三卷

右皇朝寇準字平叔華州人太平興國中登進士科  
淳化五年參知政事切直上怒起輒挽衣畱以俟處  
決定策立真宗爲皇太子景德元年拜平章事契丹  
入寇決親征之策三年出知陝州大中祥符七年同  
平章事明年罷天禧三年復相真宗不豫皇后預政  
準白上請太子監國因令楊億草制且進億以代丁  
謂詰朝準被酒漏言累貶雷州司戶徙衡州司馬卒  
後詔許歸葬公安縣民擁道設祭立竹焚紙竹無根  
株踰月皆自生民卽其地立祠名其竹曰寇公竹仁  
宗時贈中書令謚忠愍嘗封萊國公初篤學善屬文

司馬溫公刑餘文亦  
言其子奢侈子孫可  
於海上以史考之業  
公壞宅子也

尤長詩什多得警句在相位論議忠直不顧身謀仇  
邪媒藥既以謫死或又謫之云在相位時與張齊賢  
相傾朱能謂天書降乾祐準知而不言曾鞏明其不  
然曰準審如是丁謂拂須固足以悅之集有雍敘共  
二百四十首野水無人渡及江南春二首皆在獨到  
海只十里之詩已亡其全篇矣

王元之小畜集三十卷

右皇朝王禹偁字元之鉅野人家微賤九歲能為歌  
詩畢士安見而異之及長善屬文太平興國八年登  
進士第端拱初試文擢左司諫知制誥判大理寺辨

徐鉉罪忤旨貶商州團練副使久之復召知制誥入  
翰林為學士孝章皇后崩梓宮遷主第禹偁謂后嘗  
母儀天下當用舊典坐謗訕左遷知滁州真宗即位  
復召掌誥修太宗實錄坐語涉輕誣出知黃州徙蘄  
州卒年四十八元之詞學敏贍獨步一時鋒銳氣厲  
極談世事臧否人物以直道自任故屢被擯斥喜稱  
獎後進當世名士多出於門下集自為序

宋文安集一百卷

右皇朝宋白字素臣開封人年十二善屬文建隆二  
年進士調嘉州玉津令從太宗平晉獻頌上嘉之累

擢翰林學士卒祥符中謚文安白之文頗浮麗而理致或不工典貢舉取王禹偁田錫胡旦時稱得人又名廣平集

晁文元道院別集十五卷法藏碎金錄一十

卷

右五世祖文元公也諱某字明遠澶州人自父始徙家彭門幼從王禹偁學太平興國五年進士至道未擢右正言直史館知制誥入翰林爲學士加承旨眷禮優厚天禧中祈解近職判西京留司御史臺居六年請老以太子少保致仕終少傅年八十四文元謚

也國史云公樂易淳固守道甚篤雖貴勢無所摧屈嘗言歷官臨事未嘗挾情害人以售進保全護固如免髮膚之傷真宗數稱其長者楊億謂其所作書命得代言之體李獻臣亦言公服膺墳典耆年不倦少遇異人指導心要不喜術數之說疑文滯義須質正後已文章典瞻書法楷正時輩推重自唐以來世掌誥命者唯楊於陵及見其子而晁氏繼之延譽後進其門人如宋宣獻晏元憲李邯鄲皆爲世顯人集皆有自序及李遵勗後序

楊文公刀筆集十卷

自注兵部公世圖書  
焚弃之了遺法藏碎  
金世傳最廣文得之  
趙即蘇符昭德新編  
則得之於丹陵李惠道  
院集要則得之於知院  
州王輔老智餘書則得  
之於眉山程敦厚理樞  
則得之於澠沁卷中

右皇朝楊億字大年建州人祖文逸嘗夢一羽人自稱懷玉山人覺而億生白毛被體其長盈尺踰月始隨雍熙初以才名聞年纔十一召至闕下得對面試詩賦授秘書省正字宰相等賀得神童淳化中奏二京賦命試禁林賜進士第久之直集賢院修永熙實錄獨成五十六卷真宗卽位累擢知制誥入翰林爲學士祥符中母病楊翟謁告不待報歸省俄自以病丐解官以太常少卿分司病愈起知汝州復爲學士卒年四十七天性穎悟自幼迄老不離翰墨爲文敏速對客談笑揮毫無滯博聞強記於歷代典章制度尤所該通時多取正樂道人善後進翁然宗之然評品人物黑白太明姦邪疾惡之故屢被讒毀真宗愛其材特保持之僅免焉景祐中王晦叔上其爲寇相請皇太子親政疏草仁宗嘉歎特贈禮部尚書謚曰文刀筆集有陳詰序凡三百六十三首

張乖崖集十卷

右皇朝張詠字復之濮州人太平興國初進士累擢至樞密直學士御史中丞禮部尚書卒年七十少好擊劍兼通術數爲文尚氣不事彫飾自號乖崖公知益州恩威並著至今人畏愛之錢易所撰墓誌李旼

所纂語錄附于後

陳文惠公集二卷湖陽編一卷

右皇朝陳堯佐字希元閬州人端拱初進士累遷三司副使修永定實錄擢知制誥歷韶廬壽洛并同雍鄭八州景祐四年召拜同中書門下平章事後以太子太師致仕年八十三卒號知餘子謚文惠堯佐屬辭尚古不牽世用喜爲二韻詩詞調清警永雋可集皆自有序

孫漢公集三十卷

右皇朝孫何字漢公蔡州人淳化三年應進士殿省俱中第一四遷起居舍人知制誥性卞急嘗任京西東兩浙轉運使副頗事苛察幼篤學嗜古爲文宗經與丁謂同爲王元之所稱時謂之孫丁集有丁謂序

丁晉公集四卷

右皇朝丁謂字公言初字謂之蘇州人淳化三年進士累遷知制誥出知鄆毫昇三州天禧四年拜平章事俄以戶部罷未幾復相封晉國公乾興中坐擅改永定陵貶崖州司戶更赦徙道州明道末以秘書監召還卒於光州幼聰敏書經目輒記不忘善爲古文章尤工詩什儉巧險詖世鮮其儔大中祥符初議封

禪未決謂因言大計有餘議遂定當時所奏祥瑞事  
皆謂及王欽若預焉喜圖畫博奕音律吳人自陸宣  
公後至謂始相本朝熙寧以前議者莫不指謂為姦  
邪之首自王安石用事頗稱其賢智云集皆詩也

劉中山刀筆三卷淝川集四卷

右皇朝劉筠字子儀大名人咸平元年進士三遷右  
正言直史館以司諫知制誥出知鄧陳兩州召入翰  
林為學士嘗草丁謂李迪罷相制既而又命草制復  
畱丁謂筠不奉詔遂出知廬州再召為學士月餘以  
疾知潁州三名入翰林加承旨未幾進戶部龍圖閣  
學士再知廬州為人不苟合學問閎博文章以理為  
宗辭尚緻密尤工篇詠能侔揣情狀音調淒麗自景  
德已來與楊億以文章齊名號為楊劉天下宗之刀  
筆集并淝川集有黃鑑序

鮮于伯圭集一卷

右皇朝鮮于瓌字伯圭閬中人文章為一時之冠累  
舉不第嘗作摠愁詞時人稱之李宗諤贈詩云漢殿  
無人薦揚子滿朝空誦摠愁詩後與宗諤同年第四  
人登科趙普判秦州辟為觀察推官卒

晏元憲臨川集三十卷紫微集一卷

右皇朝晏殊字同叔臨川人景德二年張知白薦得  
召賜同進士出身再試文擢秘書正字爲昇王府記  
室累擢知制誥翰林學士寶元三年拜平章事坐撰  
李宸妃墓銘不言上宸妃所出及役共治產事四年  
罷知潁州歷陳許雍洛以疾歸侍經席卒性剛峻幼  
孤篤學爲文溫純應用尤長於詩抒情寓物辭多曠  
達當世賢士如范文正公歐陽文忠皆出其門女適  
富鄭公楊察世稱其知人云集有兩本一本自作序

范文正丹陽編八卷

右皇朝范仲淹字希文其先邠人大中祥符八年進

士幼隨母適朱氏名悅後復今姓名擢右司諫爭廢  
郭后事出守睦蘇二州以名充天章閣待制知開封  
獻百官圖詆宰相奪職知饒州歷潤越寶元初知永  
興陝西經畧副使涇原帥敗例降宦知耀州幾月改  
環慶遷四路經畧招討使慶曆元年召拜樞密副使  
參知政事明年宣撫河東陝西俄知邠州病請南陽  
徙杭青二州卒謚文正爲學明經術跋慕古人事業  
慨然有康濟之志作文章尤以傳道爲任事母至孝  
姑蘇之范皆疎屬置義莊以賙給之天下想聞其風  
采賢士大夫以不獲登其門爲耻獨梅堯臣嘗著碧

雲駮一編以譏詆之。云集有蘇子瞻序。

种明逸詩六卷

右皇朝种放字明逸。長安人。隱終南之豹林谷。咸平中遣使召赴闕。授左司諫。累遷諫議大夫。給事中。祥符八年終工部侍郎。放通經史。七歲能屬文。不喜釋氏。常裂佛書以製帷帳。著嗣禹說。在朝有所啟奏。時無知者。楊億譏其循默。真宗乃出其議十三篇以示輔臣。晚年頗縱酒。盛與服王嗣宗。知京兆。嘗條上其不法。詔問狀。不娶無子。集乃姪孫說所編。范吳爲之序。卷首載真宗詔書及御製詩十首。

魏仲先草堂集二卷 鉅鹿東觀集二卷

右皇朝魏野字仲先。陝州人。志清逸。以吟詠自娛。亡懷榮利。隱于陝之東郊。手植竹木。繞以流泉。鑿土袤丈。曰樂天洞。前立草堂。爲詩清苦。句多警策。與寇準王旦善。每往來酬唱。祀汾陰。歲名不起。卒贈著作郎。集有薛田序。鉅鹿東觀集乃野之作。子閑集其父詩四百篇。以贈著作。故以東觀名集。

潘逍遙詩三卷

右皇朝潘閔字逍遙。大名人。通易春秋。尤以詩知名。太宗嘗召對。賜進士第。將官使之不就。王繼恩與之




善繼恩下獄捕閔甚急久之弗得咸平初來京師尹  
收繫之真宗釋其罪以爲滁州叅軍後卒于泗上與  
王禹偁孫何柳開魏野交好最密集有祖無擇序錢  
易張達皆碣其墓附于集蘇子瞻少年時過一山院  
見壁上有詩曰夜涼知有雨院靜若無僧而不知何  
人詩今集載此聯乃閔夏日宿西禪院詩也小說中  
謂閔坐廬多遜黨嘗追捕非也

昭德先生郡齋讀書志卷第四中

昭德先生郡齋讀書志卷第四下

別集類下下

李復古集一卷



右皇朝李迪復古濮州人少從柳開學爲古文開嘗  
謂其門人張景高弁曰此公輔器也景祐初應進士  
擢居第一累遷翰林學士拜同中書門下平章事後  
致仕謚文定

孫文懿集三十卷

右皇朝孫抃字夢得眉山人六世祖長孺喜藏書貯  
以樓蜀人號書樓孫天聖中進士甲科累遷知制誥

翰林學士承旨後叅知政事謚文懿

夏文莊集一百卷

右皇朝夏竦子喬江州德安人以父死事補官舉賢良除光祿丞累擢知制誥仁宗屢欲相之爲言者所攻而寢初封英國公後改封鄭謚文莊貴顯凡四十年天資好學自經史百氏陰陽律曆之書無所不通善爲文章尤長偶儻之語朝廷大典策屢以屬之爲詩巧麗皆山勢蜂腰斷溪流燕尾分之類其集夏伯孫編次有宋次道序

宋景文集一百五十卷

右皇朝宋祁子京開封雍丘人天聖中與其兄郊同舉進士奏名第一章獻以爲弟不可先兄乃擢郊第一而以祁爲第十當是時兄弟俱以辭賦妙天下號大小宋累遷知制誥除翰林學士承旨以文章擅名一時終不至大用衆頗惜之張方平爲之請謚景文通小學故其文多奇字蘇子瞻嘗謂其淵源皆有考古嶮或難句世以爲知言集有出麾小集西川猥藁之類合而爲一

田公金巖集兩卷

右皇朝田況字元均嘗登學究進士賢良科終尚書

左丞嘗知成都聽斷之明蜀人以比張乖崖

### 林君復集二卷

右皇朝林逋字君復杭州錢塘人少刻志爲學結廬隱西湖之孤山真宗聞其名詔郡縣常存遇之善行書喜爲詩其語孤峭澄淡臨終作一絕句云茂陵他日求遺藁猶喜初無封禪書或刻石置之其墓中賜謚曰和靖先生集有梅聖俞序

### 陳亞之集一卷

右皇朝陳亞之字亞之性滑稽喜賦藥名詩仕至司封郎中藥詩者始於唐人張籍有江阜歲暮相逢地黃葉霜前半下枝之詩人謂起於亞之實不然也

### 何聖從廬江文集二十卷刀筆五卷奏議二十卷

右何<sup>朝</sup>郊字聖從成都人仁宗朝爲御史諫官擢天章閣待制熙寧中以尚書右丞致仕歷漢梓永興河南四帥守天資好學殆廢寢食爲詩章簡重淳淡有孟東野之風其仕臺諫時知無不言頗有直聲鮮于子駿嘗誌其墓集有李邦直序

### 富文忠劄子集六卷奏議十二卷

右皇朝富弼彥國河南人天聖八年中制科至和二

年召拜同中書門下平章事。元豐中卒。年八十。謚文忠。其爲文章辨而不華質而不俚。晁以道爲之序。其畧曰。人孰不仰公使虜之功。上乃拜樞密副使。而公力辭。至和之末。請立皇嗣之功。人或未聞。公於褒進。司徒則一命而不避。公每聞人語及北事。便變色。若不欲聞者。至青州救災之功。平居喜爲人道之。石介嘗以夔契方公矣。而嚴事王沂公薦士。後至將相者多矣。而最善劉槩數事。皆世所罕知者。又曰。公於仁宗時言猶雨露也。英宗時言猶海潮也。神宗時言猶鳳鳴也。

歐陽文忠公集八十卷 諫垣集八卷

右皇朝歐陽修字永叔吉州人。舉進士。累遷知制誥。夏竦以永叔黨於杜韓范富。因以外甥張氏事汚之。下開封府治之。無狀。坐用張氏奩中物。市田。出知滁州。召入修唐書爲翰林學士。未幾參知政事。蔣之奇言其帷箔事。連其長子婦吳氏。詔詰之。奇辭窮。坐貶。年六十乞致仕。卒。謚文忠。博極羣書。好學不倦。尤以獎進天下士爲已任。延譽慰籍。極其力。而後已。於經術治。其大指不求異於諸儒。與尹洙皆爲古學。遂爲天下宗匠。蘇明允以其文詞令雍容似李翱。切近適。

當似陸贄而其才亦似過此兩人至所作唐書五代史不愧班固劉向也獨議濮邸事議者不以爲是蘇子瞻序

劉公是集七十五卷

右皇朝劉敞字原甫袁州人慶曆中舉進士廷試第一累遷知制誥出知永興惑官妓得驚眩疾力求便郡仁宗謂執政曰如敞者豈易得邪賜以新橙五十爲人明白俊偉自六經百氏下至傳記無所不通爲文章尤敏瞻好摹倣古語句度在西掖時嘗食頃揮九制各得其體英宗嘗語及原甫韓魏公對以有文學歐陽公曰其文章未佳特博學可稱耳

尹師魯集二十卷

右皇朝尹洙字師魯河南人天聖中進士以薦爲館閣校勘累遷右司諫知渭州兼領涇原路經畧公事爭城永洛事爲董士廉所訟遣御史就鞫不能得其罪猶貶均州監酒師魯內剛而外和與人言必極辨其是非前世治亂沿革之變靡不該貫人有疑不能通爲指畫講說皆釋然自得尤長於春秋文章自唐末卑弱本朝柳開始爲古學天聖初與穆修大振起之

梅聖俞宛陵集六十卷

右皇朝梅堯臣聖俞宛陵人少以蔭補吏累舉進士輒抑於有司幼習爲詩出語已驚人既長學六經仁義之說其爲文章簡古純粹然最樂爲詩王舉正見而歎曰二百年無此作矣歐陽永叔與之友善其意如韓愈之待郊島云

孫明復睢陽小集十卷

右皇朝孫明復晉州人居泰山深於春秋自石介已下皆師事之年四十未娶李丞相迺以其弟之子妻之慶曆中范文正富鄭公言之于朝除國子監直講嘗對邇英閣說詩上欲以爲侍講楊安國沮之而寢

石守道集二十卷

右皇朝石介守道兗州奉符人天聖八年登進士第遷直集賢院篤學有大志嘗謂時無不可爲不在其位則行其言雖獲禍至死而不悔其爲文章陳古今治亂成敗以指切當世時無所忌諱作慶曆聖德詩分別邪正專斥夏竦其後守道死竦因誣以北走契丹請剖棺驗視云

石曼卿集一卷

右皇朝石延年曼卿南京宋城人舉進士不中爲三

多氣貌雄偉。善論事。善書。九從酒不羈世。多信其仙。去詩。九春。陰紅梅。及衆意相開。倉對法。生香。不折樹。交及。鸞鳥。不迎。春光。老。九。羽。帶。隨。日。脚。派。之。向。玉。合。佩。咏。焉。

班奉職改太常寺太祝遷秘閣校理能為詩書甚適

蘇才翁集一卷

右皇朝蘇舜元才翁子美兄也工草隸詩章豪麗

蘇子美集十六卷

右皇朝蘇舜欽子美易簡之孫也景祐中進士累遷

集賢校理監進奏院坐用故紙錢會客除名慷慨有

大志好古文章及廢居蘇州買水石作滄浪亭益讀

書發其憤懣於歌詩其體豪放往往驚人又善草書

酣醉落筆爭為人所傳翫集歐公為之序

鄭毅夫郎谿集五十卷

右皇朝鄭獬字毅夫安州人少俊異為詩賦有聲廷

試第一累遷知制誥入翰林為學士王安石不悅之

乘宰相在告除獬知杭州為文有豪氣峭整無長語

與滕達道少相善嗜酒落魄無檢操人目之曰滕屠

鄭沽云

蘇明允嘉祐集十五卷

右皇朝蘇洵字明允眉山人至和中歐陽永叔得明

允書二十二篇大愛其文辭以為雖賈誼劉向不過

也以書獻除校書郎與姚子張同編太常因革禮百

卷書方成而卒。治平史臣謂永叔所獻明允之文甚美。然大抵兵謀權利機變之言也。

蔡君謨集十七卷

右皇朝蔡襄字君謨興化人。天聖中舉進士。慶曆三年知諫院。仁宗慨然思治。增置諫官四員。君謨在選中。皇祐中知制誥。累遷翰林學士。權三司使。嘗知福州。泉杭三州。文章清道粹美。工書爲本朝第一。殘章繼藁得者珍藏之。在泉州之日喪叔母。在告其僚拱之黃垆。燕飲用樂。君謨怒。中以危法。後數爲拱之所訴。

杜師雄詩一卷

右皇朝杜默字師雄。徂徠人。石介作三豪篇所謂歌之豪者。蘇子瞻頗陋之。

鄭成之集十卷

右皇朝鄭褒字成之。閩人。登進士第。慕韓愈爲文。陳詰爲編次其集。張景爲之序。

徐仲車詩一卷

右皇朝徐積字仲車。東莞人。

邵堯夫擊壤集二十卷

右皇朝邵雍堯夫。隱居洛陽。熙寧中與當秩同色力辭不起。遂於易數始爲學。至二十年不施枕而睡。其



精如此歌詩蓋其餘事亦頗切理盛行于時卒謚康節集自爲序

張少愚白雲集三十卷

右皇朝張俞字少愚幼通悟於書無不該貫朝廷嘗以校書郎徵召表乞授其父隱於岷山之白雲谿凡六被召皆不起爲文有西漢風嘗賦洛陽懷古蘇子美見而歎曰優游感誦意不可盡吾不能也

包孝肅奏議十卷

右皇朝包拯字希仁合肥人天聖五年進士權御史中丞知開封府爲人剛嚴聞者憚之雖閭里童稚婦

女亦知其名性不苟合未嘗僞色辭以悅人平生無私書不受干請雖故人親黨一皆絕之

司馬文正傳家集八十卷

右皇朝司馬光君實也陝州夏縣人初以父蔭入官年二十舉進士甲科故相龐籍薦除館閣校理神宗卽位擢翰林學士御史中丞後除樞密副使力辭而去元祐初拜門下侍郎遷尚書左僕射卒年六十八謚文正好學如飢之嗜食於學無所不通音樂律呂天文曆數皆極其妙晚節尤好禮其文如金玉穀帛藥石也必有適於用無益之文未嘗一語及之集乃

公自編次。公薨于康。又沒屍以道得而藏之。中更禁錮。迨至渡江。幸不失墜。後以授謝克家。劉嶠得而刻版上之。今光州有集本。

王介甫臨川集一百三十卷

右皇朝王安石字介甫。撫州臨川人。慶曆三年進士。累除知制誥。神宗在藩邸。見其文異之。名爲翰林學士。熙寧三年拜中書門下平章事。熙寧七年罷。明年再入相。九年罷。卒年六十六。謚文公。其壻蔡卞謂自先王澤竭。士習卑陋。不知道德性命之理。安石奮乎百世之下。追堯舜三代。通乎晝夜陰陽。所不能測而入於神。著雜說數萬言。其言與孟軻相上下。晚以所學考字畫。奇耦橫直。深造天地陰陽造化之理。著字說。包括萬象。與易相表裏。崇寧初。卞之兄京秉政。詔配祀文宣王廟。近時議者謂自紹聖以來。學術政事敗壞殘酷。貽禍社稷。實出於安石云。

呂獻可章奏二十卷

右皇朝呂誨字獻可。洛陽人。登進士第。熙寧初爲御史中丞。時王安石棄官家居。朝野稱其才。以爲古今少倫。神宗引參大政。衆以爲得人。獻可獨以爲不然。居無何。安石棄衆任已。多變祖宗。專汲汲斂民財。所

愛信引拔或非其人。天下失望。獻可屢爭不能得。乃抗章曰：「誤天下蒼生必此人。」上遣使喻解。執之愈堅。乃出知鄧州。溫公嘗服其知人。誌其墓且序其章奏。集云：「其草存者二百八十有九。」歷觀古人有能得其一二者已可載之史籍。在獻可蓋不足道也。

蒲左丞集十卷

右皇朝蒲宗孟傳。正閩州新井人。皇祐五年進士。曾公亮薦除館職。神宗謂宰相曰：「宗孟有史才。」乃同修國史。入爲翰林學士。除尚書左丞。卒年六十六。爲人酷暴奢侈。蘇子瞻嘗規之云：「一曰慈。二曰儉。世以爲中其膏肓之疾。」

趙懿簡集三十卷

右皇朝趙瞻。大觀。盩厔人。少善爲古文。慶曆五年登進士第。治平中爲侍御史。論濮邸事。及貶。元祐中終於同知樞密院。謚懿簡。學春秋著書十卷。其他文不皆奇也。

鮮于諫議集三卷

右皇朝鮮于侁。子駿。閬中人。景祐中登進士乙科。神宗初上書。上愛其文。以爲不減王陶。元祐中仕至諫議大夫。侁治經術有法。論著多出新意。晚年爲詩與

楚詞尤精人以爲有屈宋風族姪之武編次有序

楊元素集四十卷

右皇朝楊繪字元素漢州綿竹人幼警敏讀書一過輒誦至老不忘皇祐初擢進士第二人累擢翰林學士沈存中爲三司使暴其所薦王永年事因貶官終於天章閣待制知杭州嘗居無爲山號無爲子爲文立就

曾子固南元豐類藁五十卷

右皇朝曾鞏字子固南豐人元豐中爲中書舍人卒子固師事歐陽永叔早以文章名天下壯年其文慄驚

奔放雄渾瓌瑋其自負要似劉向藐視韓愈以下也晚年始在掖垣屬新官制方除日填委占紙肆書初若不經意及屬草授吏所以本法意原職守爲之訓勅者人人不同瞻裕雅重自成一家歐公門下士多爲世顯人議者獨以子固爲得其傳猶學浮屠者所謂嫡嗣云

李誠之集三卷

右皇朝李師中字誠之登進士科仁廟時宗朝權廣南轉運使終天章閣待制唐子方貶春州誠之嘗有詩送行盛傳一時

孫莘老奏議十卷

右皇朝孫覺字莘老元豐末自秘書少監除右諫議大夫元祐初遷給事中吏部侍郎莘老素與王介甫善後爲諫官論新法遂絕

李公擇廬山奏議十七卷

右皇朝李常字公擇早年讀書於廬山熙寧中爲諫官論青苗法而罷元祐初爲御史中丞

孫賢良進卷十卷

右皇朝孫洙字巨源廣陵人歐陽永叔舉洙賢良上策論五十篇極論時事元豐中直學士院奉詔作靈

津廟碑上稱洙學術行誼且大用之暴得風緩而卒或云上欲復大理獄洙對合旨由是驟進

錢賢良進卷十卷

右皇朝錢公輔字君倚武進人從胡瑗學昭陵未知制誥

文與可丹淵集四十卷

右皇朝文同與可蜀人進士高第以文學名操韻高潔畫筆尤妙仕至太常博士集賢校理元豐初出守吳興至宛止驛忽畱不行一旦沐浴冠帶正坐而逝

呂晉伯懶川集五卷奏議十卷

右皇朝呂大忠字晉伯藍田人汲公之兄皇祐中進士除檢討樞密院吏房文字爲河北轉運判官累遷寶文閣直學士晉伯博極羣書爲文尚理致有益於用章奏皆親爲之

呂汲公文錄二十卷文錄掇遺一卷

右皇朝呂大防微仲京兆藍田人皇祐初中進士第哲宗卽位召知制誥翰林學士拜尚書左僕射兼門下侍郎紹聖初責授舒州團練副使循州安置末踰嶺卒大防旣拜相常分其俸之半以錄書故所藏甚富其在翰林書命典麗議者謂在元絳之上云

呂和叔誠德集三十卷

右皇朝呂大鈞字和叔嘉祐二年中進士第大防仲弟也終於宣義郎鄜延路漕司屬官師張厚之贍學博聞無所不該其文章非義理不發

呂與叔玉溪集二十五卷玉溪別集一十卷

右皇朝呂大臨字與叔汲公季弟也登進士第嘗歷太學博士秘書省正字從程正叔張厚之學通六經尤精於禮解中庸大學等篇行于世嘗賦詩云學如元凱方成癖辭類相如始近俳獨倚聖門無一事願同回也得心齋正叔可之

晁氏新城集十卷

右皇朝族祖新城府君也公諱某字君成早登進士第爲杭州新城令以沒蘇子瞻嘗稱其詩清厚靜深而每篇輒出新意奇語

蘇子瞻東坡前集四十卷後集二十卷奏議十五卷內制十卷外制三卷和陶集四卷應

詔集十卷

右皇朝蘇軾字子瞻洵之長子也軾生十年其母授以書聞古今成敗輒能語其要比冠學通經史屬文日數千言嘉祐中歐陽永叔考試禮部進士梅聖俞

與其事得其論刑賞以示永叔至驚喜以爲異人欲以冠多士疑曾子固所爲乃寘之第二等後以書謝永叔見之語客曰老夫當避此人放出一頭地又以直言薦之答策入上等英宗在藩邸聞其名欲以唐故事召入翰林宰相不可知湖州以表謝上言事者摘其語以謗聞遣官逮赴御史獄初子瞻當王安石紛更法度之際見其事不便於民賦詩以刺焉言者從而搆孽欲寘之死神宗薄其過謫置黃州溫公相哲宗累擢中書舍人除翰林學士承旨紹聖中坐草謫呂惠卿制直書其罪誣以訕謗安置惠州徙昌化元

符中北還卒於常州初好賈誼陸贄書論古今治亂  
不爲空言既謫黃州杜門深居馳騁翰墨其文一變  
平生遇事所爲詩騷銘記書檄論議率皆過人晚喜  
陶淵明詩和之幾徧爲人英辨奇偉於書無所不通  
所作文章才落筆四海已皆傳誦下至閭閻田里外  
至夷狄莫不知其名門下賓客亦皆一世豪傑其盛  
本朝所未有也立朝知無不爲世稱其忠義嘗自比  
范滂孔融議者不以爲過在黃州日自號東坡居士  
世因不呼其名止目之爲東坡云

蘇子由欒城集前集五十卷後集二十四卷

第三集十卷應詔集十二卷

右皇朝蘇轍子由洵之次子也年十九中進士第二  
十一舉直言因所問極言得失策入或欲黜之仁宗  
不許曰以直言召人而以直言見弃天下謂我何擢  
商州推官久之其兄以詩得罪從坐謫監筠州酒稅  
宣仁臨朝相溫公擢中書舍人代子瞻爲翰林學士  
未幾拜尚書左丞紹聖初謫置雷州後北還凡居雷  
循七年居許十六年杜門理舊學於是詩春秋傳老  
子解古史書皆成自謂得聖賢遺意

程伊川集二十卷



右皇朝程頤字正叔。珦之子也。少與其兄顥從汝南周敦實爲學。元祐初，司馬溫公薦于朝，自布衣擢崇政殿說書。未幾罷，紹聖中嘗謫涪陵，專務談經明道，深斥辭章之學。從其游者多知名于世。

曾子開曲阜集四十卷，奏議十二卷，西掖集

二卷，內制五十卷。

右皇朝曾肇字子固之弟也。登進士第。元祐中爲中書舍人。元符末，再入西掖，遂爲翰林學士。前後歷陳頴、宋泰海和金陵、真定、九郡帥守，坐兄子宣貶亦以散官汀州安置。崇寧末，移台州，居京口而終，封

曲阜侯。

黃魯直豫章集三十卷，外集十四卷。

右皇朝黃庭堅魯直，幼警悟，讀書五行俱下，數過輒憶。蘇子瞻嘗見其詩於孫莘老家，絕歎以爲世久無此作矣。因以詩往來，會子瞻以詩得罪，亦罰金。元祐中爲校書郎。先是秦少游晁無咎、張文潛皆以文學遊蘇氏之門，至是同入館，世號四學士。而魯直之詩尤奇，世又謂之蘇黃云。紹聖初，謫戎州。嘗因嘲諷忤趙正夫及正夫爲相，諭部使者以風指摘所作承天院塔記中語以爲幸災謗國，遂除名編隸宜州。以崇

寧四年九月三十日卒

晁無咎雞肋編七十卷

右皇朝族父吏部公也。公諱補之，字無咎，幼豪邁，英爽不羣。七歲能屬文，日誦千言。王安石名重天下，慎許可，一見大奇之。在杭州作文曰七述，敘杭州之山川人物之盛麗。時蘇子瞻倅杭州，亦欲有所賦，見其所作，歎曰：吾可以閣筆矣。子瞻以文章名一時，至屈輩行與之交，由此聲名籍甚。舉進士禮部別試第一，而考官謂其文辭近世，未有遂以進御。神宗曰：是深於經，可革浮薄。元祐中除校書郎，紹聖初落職監信。

張耒嘗言無咎

州酒後知泗州，終于官。大觀四年也。於文章蓋天性，讀書不過一再，終身不忘。自少爲文，卽能追考左氏戰國策、太史公、班固、楊雄、劉向、屈原、宋玉、韓愈、柳宗元之作，促駕而力鞭之，務與之齊而後已。其凌厲奇卓，出於天才，非醞釀而成者。自韓柳而還，蓋不足道也。

秦少游淮海集三十卷

右皇朝秦觀少游，高郵人。登進士第。元祐初除校勘黃本書籍，紹聖初除名編隸橫州，遇赦北歸。至藤州卒。蘇子瞻嘗謂李廌曰：少游之文如美玉無瑕，又琢。

王介甫謂其詩新精  
嫉惡嚴謝似

磨之功殆未有出其右者少游亦自言其文銖兩不差但華麗為愧耳呂氏童蒙訓謂少游過欲後詩嚴重為古自成一家與舊作不同

### 張文潛柯山集一百卷

右皇朝張耒文潛譙郡人仕至起居舍人嘗為宣潤汝穎兗五州守又嘗謫居黃州復州最後居陳以沒元祐中蘇氏兄弟以文倡天下號長公少公其門人號四學士文潛少公之客也諸人多早沒文潛獨後亡故詩文傳于世者尤多其於詩文兼長雖同時鮮復其比而晚年更喜白樂天詩體多効之云

### 畢公叔西臺集二十卷

右皇朝畢仲游字公叔蚤登進士第元祐中召天下文學之士三人策試翰林院蘇子瞻以公叔為第一除集賢校理又表自代云學貫經史才通世務文章精麗論議有餘自臺郎為憲漕綽有能聲以黨籍終於西京畱臺集陳叔易為之序

### 陳無已後山集二十卷

右皇朝陳師道無已彭城人公少以文謁曾南豐一見奇之許其必以文著元祐中侍從合薦于朝起為太學博士紹聖中以進非科舉而罷建中靖國初入秘書為正字以卒為文至多少不中意則焚之存者

才十一

臨溪隱居集二十卷 一作臨溪

右皇朝魏泰字道輔襄陽人曾布子宣妻之弟也幼邁爽能屬文嘗從徐禧晚節卜隱漢上人頗言其倚子宣之勢為鄉里患苦云

廖明畧竹林集三卷

右皇朝廖正一字明畧元祐中名試館職蘇子瞻在翰林見其所對策大奇之俄除正字時黃秦晁張皆子瞻門下士號四學士子瞻待之厚每來必命侍妾朝雲取密雲龍家人以此知之一日子瞻又取密雲

龍家人謂是四學士窺之乃明畧來謝也紹聖間明畧貶信州玉山監稅鬱鬱不得志喪明而沒自號竹林居士

邢敦夫呻吟集一卷

右皇朝邢君實敦夫和叔之子年十四賦明妃引蘇子瞻見而稱之由是知名未幾和叔貶隨州敦夫侍行病羸嘔血一旦有鈴下老卒驕慢應對不遜敦夫怒而擊之無何卒死和叔怒以敦夫屬吏以故疾日侵而天黃魯直為之挽云眼看白璧埋黃壤何況人間父子情蓋隱之也集後有子瞻魯直無咎諸公跋

員逢原三蓮集二十卷

右皇朝員逢原關中人仕至朝議大夫

司馬才仲夏陽集二卷

右皇朝司馬標字才仲溫公之姪孫元祐初與王常輩同中賢良科調錢塘尉而卒喜為宮體詩故世傳其為鬼物所祟而卒

司馬才叔逸堂集十卷

右皇朝司馬械字才叔才仲之弟也登進士第亦嘗應賢良以黨錮不召詩雖纖艷比其兄稍莊雅

張浮休畫墁集一百卷奏議十卷

右皇朝張舜民芸叟邠州人慶曆中范仲淹帥邠見其文異之用溫公薦為諫官仕至吏部侍郎後羈置房陵政和中卒其文豪重有理致而最刻意於詩晚年為樂府百餘篇自序稱年踰耳順方敢言詩百世之後必有知音者云自號浮休先生

唐張翥稱浮休子芸叟蓋飛也

陳瑩中了齋集三十卷

右皇朝陳瓘瑩中延平人建中靖國初為右司諫嘗移書責曾布及言蔡京與弟卞之姦惡章數十上除名編隸合浦以死靖康初贈諫議大夫自號了翁

陳司諫集二卷

右皇朝陳祐字純益仙井監人登進士第建中靖國  
初爲臺諫與龔夬任伯雨張公望協力彈擊紹聖姦  
臣後蔡京用事廢斥而沒

張無盡集三十二卷

右皇朝張商英字天覺登第調官峽路章惇察訪巴  
蜀風采傾動西南峽中使者憂之日夕謀所以待  
之之禮曲盡因求辨博之士以備燕談或以天覺姓  
名告因檄召至夔州惇既至杯酒間果以人材爲問  
部使者卽言之惇令召入天覺不冠服絻巾長揖徑  
就坐左惇負氣敢大言天覺輒吐言壓之惇大喜歸

而薦於朝由是召用元祐中爲開封府推官出使河  
東紹聖初擢御史大觀四年長星見蔡京罷相乃拜  
右僕射盡反京之政召用元祐遷客天下翕然歸重  
期年去位靖康初遂與司馬溫公范文正公同日降  
制加贈官爵賜諡文忠疑范文正乃忠宣也

晁氏景迂集十二卷

右從父詹事公也諱說之字以道文元公元孫少慕  
司馬溫公爲人自號景迂生年未三十蘇子瞻以著  
述科薦之元符中上書居邪中等博極羣書通六經  
尤精於易傳邵堯夫之學著太極傳摺紳高其節行

嘗守成州時民訴歲旱公以爲十分盡蠲其稅轉運使大怒督責甚峻因丐老而歸靖康初以著作郎召遷秘書監免試除中書舍人兼太子詹事俄以論不合去建炎初終於徽猷閣待制

晁氏崇福集三十五卷四六集十五卷

右從父崇福公也諱誅之字之道以道弟也登進士第又中宏詞第一元符末上書居邪等廢斥二十年以朝請郎奉祠崇福宮而終天才英特爲文章立成明潤密緻世以爲宜在北門西掖云

晁氏封正集二十卷

右世父封正府君也諱某字伯宇鑠廳中進士第黃魯直嘗薦之於蘇子瞻云晁伯宇謹厚守文元家法從游多長者其文已能如此年蓋未二十也願子瞻一語教戒之子瞻答云晁伯宇詩騷細看甚奇麗信乎其家之多異材也雖然凡文至足之餘溢爲奇偉今晁君文涉奇似太早可作朋友切磋之語以告之非謂其諱也恐傷其邁往之氣耳後坎壈終身卒官封正丞

唐子西集十卷

右皇朝唐庚字子西眉山人登進士第早受知於張

天覺天覺為相擢京畿提舉常平且欲用為諫官天覺去位後言者謂子西嘗宣言有一網打盡之語貶惠州大觀五年會赦北歸

韓子蒼集三卷

右皇朝韓駒子蒼仙井人政和初詣闕上書特命以官累擢中書舍人權直學士院王甫嘗命子蒼詠其家藏太一真人圖詩盛傳一時宣和廷臣獨以能詩稱云

劉巨濟前溪集五卷

右皇朝劉涇字巨濟蜀人終于太學博士為文頗奇

怪

崔德符婆娑集三十卷

右皇朝崔鷗字德符蚤中進士第元符末上書入邪等廢斥幾三十年靖康初召為右正言居無何感疾卒其為文最長於詩清婉敷腴有唐人風

李元應跨黿集五十卷

右皇朝李新字元應仙井人早登進士第劉涇嘗薦于蘇子瞻命賦墨竹口占一絕立就坐元符末上書奪官謫置遂州流落終身跨黿仙井山名也

王履道初寮集十卷內制十八卷外制八卷



右皇朝王安中履道真定人政和中有密薦於上者自監大名倉累擢掌內外制後拜太保鎮燕山建炎初貶象州爲文瓌奇高妙最長於制誥李邴入翰林嘗請於上以方今詞林之式上首尾舉履道之名自號初寮先生

陳呂居仁集十卷外集二卷

右皇朝呂本中字居仁好問右丞之長子靖康初權尚書郎紹興中賜進士第除右史遷中書舍人已而落職奉祠少學黃山谷爲詩嘗作江西宗派圖行于世

陳叅政簡齋集二十卷

右皇朝陳與義去非汝州葉縣人中進士第宣和中徽宗見其所賦墨梅詩喜之遂登冊府建炎中掌內外制拜叅知政事以卒晚年詩尤工周葵得其家所藏五百餘篇刊行之號簡齋集

胡承公集十卷資古紹志集十卷

右皇朝胡世將字承公中進士科早受知於晁無咎建炎南渡嘗直學士院終於資政殿學士川陝宣撫使爲文敏贍溫雅掌書命頗有能聲喜聚金石刻効歐公集古錄爲資古紹志集序云以成其先人之志

故以紹志目其書

參寥集十二卷

右皇朝僧道潛自號參寥子與蘇子瞻秦少游為詩友其詩清麗不類浮屠語世稱其東園贈款者兩絕句餘多類此

洪覺範筠溪集十卷

右皇朝僧惠洪覺範姓喻氏高安人少孤能緝文張天覺聞其名請住峽州天寧寺以為今世融肇也未幾坐累民之及天覺當國復度為僧易名德洪數延入府中及天覺去位制獄窮治其傳達言語於郭天信竄海南島上後北歸建炎中卒著書數萬言如林間錄僧寶傳冷齋夜話之類皆行于世然多夸誕人莫之信云

饒德操集一卷

右皇朝饒節字德操曾布之客也性剛峻晚與布論不合因弃去祝髮為浮屠在襄漢間聲望甚重云

李易安集十二卷

右皇朝李氏格非之女先嫁趙誠之有才藻名其舅正夫相徽宗朝李氏嘗獻詩曰炙手可熱心可寒然無檢操晚節流落江湖間以卒

詹玠將歸集一卷

一本云詹玠二字

右未詳何人有題林逋隱居詩當是昭陵時人也

趙韓王集三卷

右皇朝趙普字平則薊州人其父遷洛陽占籍焉乾德中代范質爲平章事太平興國六年及端拱初三人相薨封真定王諡忠獻卒年七十一普初無學術太宗勉之晚年頗該博

范蜀公集十卷

右皇朝范鎮字景仁成都人舉進士爲禮部第一仁宗朝知諫院後言王安石新法不便乞致仕歸潁昌元祐初詔召不起封蜀郡公年八十一諡忠文

黃虞部詩一卷

右皇朝黃觀昭陵時嘗將漕成都

呂吉甫集二十卷

右皇朝呂惠卿字吉甫閩人王安石執政擢參知政事元祐初謫知福州紹聖後累領藩鎮有莊子解爲文長於表奏

張橫渠崇文集十卷

右皇朝張載字厚之京師人後居鳳翔之橫渠鎮學者稱曰橫渠先生呂晦叔薦之於朝命校書崇文未幾詔按獄浙東旣歸卒

馭臣鑒古二十卷

右皇朝鄧綰所著。綰元豐中爲中丞，所獻書也。未幾坐操心頗備，賦性姦回，論事薦人，不循分守，貶。

余氏至言十八篇

右皇朝余安行，字仲勉，鄱陽人。少受知于彭汝礪，年八十餘著此書，自謂有得于中庸也。東南學者多宗之。

河間公奏議十卷

右皇朝朱光庭，元祐中爲諫官，時所論事也。

汲世論一卷

右未詳何人所著，多稱元祐間事，且喜論兵，疑呂氏書也。凡十門。

陳叔易詩二十卷

右皇朝陳恬，字叔易，堯叟裔孫。

藏寂軒文藁

右皇朝董 字 襄陽人。

趙延持盈要論

右皇朝趙延宣，和初任合州石照縣丞，日所上。

汪彥章集十卷

右皇朝汪藻，字彥章，嘗爲翰林學士。

詩苑類格三卷

右皇朝李淑撰寶元三年豫王出閣淑爲王子傅因纂成此書上之述古賢作詩體格總九十段

韓文辨證八卷

右皇朝洪興祖討論韓愈詩文推考其根源因以訂正其訛繆頗爲該洽云

藝圃折衷六卷

右皇朝鄭厚莆陽人紹興中舉進士第一坐臺評廢于家

昭德先生郡齋讀書志卷第四下

昭德先生郡齋讀書志卷第四下

總集類

李善注文選六十卷

右梁昭明太子蕭統纂前有序具述其所作之意蓋選漢迄梁諸家所著賦詩騷七詔策令教冊秀才文表上書啟彈事牋記書移檄難對問議論序頌贊符命史論連珠銘箴誄哀策碑誌行狀弔祭文類輯之爲三十卷竇常謂統著文選以何遜在世不錄其文蓋其人既往而後其文剋定然所錄皆前人作也唐李善集注析爲六十卷善高宗時爲弘文學士博學

經史百家無不備覽而無文時人謂之書簾初爲輯注博引經史釋事而忘其義書成上進問其子邕邕無言善曰非耶爾當正之於是邕更加以義釋解精於五臣今釋事加義者兩存焉蘇子瞻嘗讀善注而嘉之故近世復行

### 五臣注文選三十卷

右唐呂延祚集注延祚以李善止引經史不釋述作意義集呂延濟劉良張詵呂珣李周翰五人注延祚不與焉復爲三十卷開元六年延祚上之名曰五臣注

### 唐文粹一百卷

右皇朝姚鉉寶臣編鉉廬州人太平興國初進士文辭敏麗善書札藏書至多頗有異本累遷兩浙漕課吏寫書采唐世文章分門編類初爲五十卷後復增廣之爲薛映掎其事奪官斥連州卒復其子以其書上獻詔藏內府命以一官

### 古樂府十卷并樂府古題要解兩卷

右唐吳兢纂雜采漢魏以來古樂府詞凡十卷又於傳記洎諸家文集中采樂府所起本義以釋解古題云

玉臺新詠十卷

右陳徐陵纂唐李康成云昔陵在梁世父子俱事東朝特見優遇時承平好文雅尚宮體故采西漢以來詞人所著樂府艷詩以備諷覽且爲之序

玉臺後集十卷

右唐李康成采梁蕭子範迄唐張赴二百九人所著樂府歌詩六百七十首以續陵序編謂名登前集者今並不錄唯庾信徐陵仕周陳旣爲異代理不可遺云

續古今詩苑英華集十卷

右唐僧惠淨撰輯梁武帝大同年中會三教編至唐劉孝孫成臯望河之作凡一百五十四人歌詩五百四十八篇孝孫爲之序

珠英學士集五卷

右唐武后朝詔武三思等脩三教珠英一千三百卷預修書者凡四十七人崔融編集其所賦詩各題爵里以官班爲次融爲之序

麗則集五卷

右唐李氏撰不著名集文選以後至唐開元詞人詩凡三百二十首分門編類貞元中鄭餘慶爲序

中興間氣集三卷

右唐高仲武輯至德迄大曆中錢起以下二十六人詩自為序以天寶之亂述作中廢至德中興風雅復振故以名仍品藻衆作著之於前云或又題孟彥深纂

南薰集三卷

右唐竇常撰集韓翃至皎然三十人約三百六十篇凡三卷其序云欲勒上中下則近於褒貶題一二三則有等差故以西掖南宮外臺為目人各系名系贊本事詩一卷

右唐孟棻撰纂歷代詞人緣情感事之詩敘其本事凡七類

續本事詩二卷

右偽吳處常子撰未詳其人自有序云比覽孟初中本事詩輒搜篋中所有依前題七章類而編之然皆唐人詩也

斷金集一卷

右唐令狐楚韓琪與李逢吉酬唱詩什開成初裴夷直序之

漢上題襟集十卷



右唐段成式輯其與溫庭筠余知古酬和詩筆牋題  
松陵集十卷

右唐皮日休與陸龜蒙酬唱詩凡六百五十八首龜  
蒙編次之日休爲之序松陵者平江地名也

西崑酬唱集二卷

右皇朝楊億劉筠李宗諤晁某錢惟演及當時同館  
十五人唱和詩凡二百四十七章前有億序

唐宋類詩二十卷

右唐朝僧仁贊序稱羅唐兩士所編而不載其名分  
類編次唐及本朝祥符已前名人詩

唐百家詩選二十卷

右皇朝宋敏求次道編次道爲三司判官嘗取其家  
所藏唐人一百八家詩選擇其佳者凡一千二百四  
十六首爲一編王介甫觀之因再有所去取且題云  
欲觀唐詩者觀此足矣世遂以爲介甫所纂

寶刻叢章三十卷

右皇朝宋敏求次道編次道聚天下古人詩歌石刻  
凡一千一百三十篇多有別集中所逸者以其相附  
近者相從又次以歲月先後王益柔爲之序云文章  
難能者莫如詩凡刻之金石者則必其自以爲得或

作於人所愛重者故多有清新瓌麗之語覽者其深究焉

歲時雜詠二十卷

右皇朝宋綬編宣獻公昔在中書第三閣手編古詩及魏晉迄唐人歲時章什一千五百有六釐爲十八卷今溢爲二十卷矣

仕塗必用集二十一卷

右皇朝祝熙載編本朝楊劉以後諸公表啟爲一編聖紹堯章集十卷

右皇朝李文友編靖康末至紹興十年赦書詔旨

丹陽類稿十卷

右皇朝曾收編丹陽今潤州春秋曰朱方秦曰丹徒孫權改名京口東晉僑立州郡至宋齊陳曰東海獨梁曰蘭陵而皆以徐州稱之隋始定今名唐以建康諸邑隸焉更爲丹陽郡元豐中收守官于其地因采諸家之集始自東漢終于南唐凡得歌詩賦贊五百餘篇

雲臺編六卷

右皇朝耿思柔纂華州雲臺觀古今君臣所題詩什清才集十卷

右皇朝劉禹卿編輯古今題劍門詩什銘賦蒲逢爲之序

瑤池新集一卷

右唐蔡省風集唐世能詩婦人李秀蘭至程長文二十三人詩什一百十五首各爲小序冠於其前且總爲序其畧云世叔之婦修史屬文皇甫之妻抱忠善隸蘇氏雅於回紇蘭英擅於宮掖晉紀道蘊之辨漢尚文姬之辭况今文明之盛乎

九僧詩集一卷

右皇朝僧希晝保進文兆行肇簡長惟鳳惠業牢昭

懷古也陳充爲序凡一百十篇歐公曰進士許洞因會九僧分題出一紙約曰不得犯一字其字乃山水風雲竹石花草雪霜星日禽鳥之類於是諸僧皆閣筆此本出李夷中家其詩可稱者甚多惜乎歐公不盡見之許洞之約雖足以困諸僧然論詩者政不當爾蓋詩多識鳥獸草木之名而楚辭亦寓意於颺風雲霓如池塘生春草窗間列遠岫天際識歸舟雲中辨江樹蟬噪林逾靜鳥鳴山更幽庭草無人隨意綠宮漏出花遲楓落吳江冷空梁落燕泥微雲淡河漢疎雨滴梧桐殘星幾點鴈橫塞長笛一聲人倚樓雞

聲茅店月人跡板橋霜之類莫不犯之若使諸公與許洞分題亦須閣筆矧其下者哉

聖宋文粹三十卷

右不題撰人輯慶曆間羣公詩文劉牧王通之徒皆在其選

宋文海一百二十卷

右皇朝江旼編輯本朝諸公所著賦詩表啟書論說述議記序傳文贊頌銘碑制詔疏詞誌挽祭禱文凡三十八門雖頗該博而去取無法

皇宋詩選五十七卷

右皇朝曾慥曾公裔孫守贛川帥荆渚以選本朝自寇萊公已次至僧璉二百餘家詩序云博采旁搜拔尤取穎悉表而出焉

政和文選二十卷

右政和中或編元豐以後人詩文千餘篇徐禧席旦其知名者也

西漢文類

右唐柳宗直撰其兄宗元嘗爲之序至皇朝其書中陶氏者重編纂成之

昭德先生郡齋讀書志卷四下下



君...  
...

八月二十夜校五月上 鱧

